

# مشروع الحكواتيات

## ورشة المعارف

الحكواتية: وفاء فخر الدين

التاريخ: ١١ أيار ٢٠١٩

رقم الأرشيف: 19-PS/SS-004

نوع الأرشيف: للاستخدام العام

### ورشة المعارف

بناية أنطوان فرح، الطابق ٣  
شارع المنتزه، فرن الشباك  
بيروت، لبنان

السلسلة/الموضوع الرئيسي	قصص من الجنوب
رقم الأرشيف	19 PS/ SS- 004
نوع الأرشيف	للاستخدام العام
الحكواتية	وفاء فخر الدين
تاريخ ميلاد الحكواتية	حزيران ١٩٧١
تاريخ ومكان المقابلة	١١ أيار ٢٠١٩، كفرمان
ملخص التاريخ الشفوي	تتذكر وفاء فخر الدين في هذه المقابلة طفولتها في كفرمان، وأيام الاجتياح الإسرائيلي واستشهاد والدها، وكيف عاشت هي كوالدة نفس المخاوف التي عاشها أهلها خلال الحرب. تتذكر الضيعة وأهلها المزارعين وحبهم للأرض، وتتكلم عن الظروف القاسية التي مرّت بها العائلة، وتحكي قصتها مع زوجها وقد كانا "رفاق الصغر". وفي مقارنتها بين الماضي واليوم، تشرح عن الطقوس التي تغيرت، ان كانت الطقوس الاجتماعية/الزراعية مثل يوم العونة لتحويش الزيتون، أو الطقوس الاجتماعية/الدينية كعاشوراء. تتكلم عن بداية اهتمامها بالبيئة ومشروعها البيئي Terre net والممارسات اليومية التي تضرّ بالبيئة، وتعامل المجتمع مع مشروعها للفرز من المصدر، من دعم ومعارضة. تحكي عن نظرة المجتمع اليها كامرأة تؤسس جمعية وكيف تنسق بين عملها البيئي والاجتماعي والرعائي.
معلومات عن الباحثة	نسرين رجب هي كاتبة حاصلة على شهادة الدراسات العليا في اللغة العربية وآدابها.
التفريغ	هند يونس
الترجمة والتدقيق	ديانا خنافر
الكلمات الدلالية	كفرمان- الاحتلال الإسرائيلي-الاجتياح-القصص-استشهاد- الجامعة الامريكية-الزراعة- حب الأرض- الطفولة- زواج- رياضيات- النبطية-جزّين- الجامعة- أولاد- تعليم- كشاف-كشاف ديني-مواطنة-المجال البيئي- إعادة التدوير-بلاستيك-ثقافة الاستهلاك-قناني الماء-تلوث-زيبب مقأد-فرز من المصدر-النفائيات العضوية-زباله- حركة اقتصادية- محاسبة-تشجير - جمعيات- جمعية ببنية-التعاون- Terre-net - قراءة-

## Rights of Ownership for the Storytellers Project

The Knowledge Workshop holds full or co-ownership of all items that it archives and publishes. Recordings published on the Knowledge Workshop website can be used only for cultural, educational and non-profit purposes, and never for commercial purposes.

To use the material on our website, including the oral histories and their related images, we ask that you always reference the Knowledge Workshop with: Storytellers's name, interviewed by Researcher, Date, The Storytellers Project, the Knowledge Workshop, Beirut, Lebanon, page number. [Ex. Nazik Saba Yared, interviewed by Deema Kaedbey, 2017, The Storytellers Project, the Knowledge Workshop, Beirut, Lebanon, pp 12.]

To use the limited-use items held within the Knowledge Workshop, you can visit our office in Furn El Chebbak and fill out a permission form. You can use these items inside the Knowledge Workshop space, but we request that you consult with us on which items you can use. Some of these items require permission from the storytellers before being used.

### حقوق ملكية لمشروع الحكواتيات

لورشة المعارف ملكية تامة أو مشتركة للمواد التي تورشفها وتنشرها. التاريخ الشفوي المنشور على الصفحة الالكترونية لورشة المعارف يمكن استعمالها فقط لأهداف ثقافية وتنقيفية لا تبغى الربح، ولا يمكن استعمالها لأهداف تجارية تبغى الربح.

لاستعمال المواد على صفحتنا الالكترونية، من ضمنها التاريخ الشفوي والصور المرافقة نطلب منكم التنويه بورشة المعارف كمرجع باستعمال: اسم الحكواتية، قابلتها اسم الباحثة، السنة، مشروع الحكواتيات، ورشة المعارف، بيروت، لبنان، الصفحة. [مثلاً: نازك سابا يارد، قابلتها ديمة قاندييه، ٢٠١٧، مشروع الحكواتيات، ورشة المعارف، بيروت، لبنان، ص. ١٢]

لاستعمال المواد المحددة للاستعمال الموجودة في ورشة المعارف (الغير متاحة على صفحتنا)، يمكنكم القدوم الى مكتبنا في فرن الشباك وتعبئة استمارة الطلب. بالإمكان استعمال هذه الموارد داخل ورشة المعارف، لكن نسألكم ان تستشيرونا عن أي مواد يمكن استعمالها. بعض هذه المواد تتطلب طلب من الحكواتيات قبل استعمالها.

نسرين رجب [00:00:03]: مرحبا أنا نسرين اليوم التاريخ 11 ايار 2019، أنا في كفرمان في منزل الاستاذة وفاء فخر الدين عم أعمل مقابلة تاريخ شفوي لصالح ورشة المعارف. شكراً إنك قبلي هاي المقابلة.

وفاء فخر الدين [00:00:16]: أهلاً وسهلاً فيكي حبيبتي.

ن.ر. [00:00:21]: بدايةً بتعرفينا عن حالك، اسمك، وين خلقتي.

و.ف.ا. [00:00:23]: اسمي وفاء مصطفى فخر الدين. أنا خلقت بكفرمان بسنة ال 71، بـ 10 حزيران ال 71. عشت طفولتي هون بقلب كفرمان، حوالي العشر سنين تقريباً، لـ من ال 71 لبداية الاحتلال الاسرائيلي 82. طبعاً هاي المراحل [تسعل]، بذكر منها بال 76 يعني كان عمري 5-6 سنين لما صار في أول، شو اسمه اجتياح اسرائيلي بال 76، محاولة الاجتياح، بتذكر مثلاً إنه كنا نهرب من بيتنا عند بيت جدي، لأنه أئمن. نمشي أنا وإخواتي ورا أهلي، وبس يصير في شي "انبطحوا، ناموا بالأرض، قوموا واركضوا"، لحد ما اجا بال 82، يعني كنا أول وعينا ومدارس. صار الاجتياح بال 82، نحنا كنا، قد ما اشتد القصف بمنطقة بالمنط بوقت ال 80، بمنطقة كفرمان يعني يكون في قصف دائم وعشوائي وبأي وقت، خوفاً علينا، أهلنا أخذونا، استأجرنا بيت بمنطقة جزين حيطورة. سكنا هونيك وصرنا نروح على مدارس المنطقة، لحد ما إنها فانتت اسرائيل بسنة ال 82، كمان تهجرنا مثل ما الناس تهجرت، ونزلنا على بيروت. وبعدين قضينا وقت عودة على باتر، وصعوباته. وصلنا على بلدنا، طبعاً في دمار وفي بيوت بتتسكن وفي لأ. سكنا ببيتنا بقلب كفرمان، وكملنا دراستنا بمدرسة كفرمان الرسمية ومن بعد منها، فترة شي 4-5 سنين، الاسرائيلي انسحبوا من منطقة بيروت لوصلوا على مشارف كفرمان. يعني نحنا قاعدين بنص كفرمان والنص الثاني كان محتل، وكانت اسرائيل على التلال المشرفة على كفرمان. من سنة ال، بعد ال 85 لعند ال 2000 لحتى دحر الاحتلال، كانت سنوات عجاف، مرة، قاسية كتير بالقصف، بالقواص بالضرب، بالي مرقوا علينا يعني. الناس إلي استشهدت بين ايدينا وكنا نحنا أول طلعتنا، كان في أمور قاسية كتير، بتخليكي إنه إنتي، لا بد إنه تواجهي، تنتفضي. كان يصير القصف مرات بالليل، البيت يوقع، الحسينية مثلاً مرة وقعت، قصفوا عليها. بالنهار نقوم نبش نرجع نساعد الناس الي بيتها تضرر، نلاقيهن بيت يومي لحتى ثاني يوم يعمروا الي تهدم. بعدين أنا كنت عايشة طبعاً مع أهلي، نحنا 6 ولاد. والدي كان مزارع. وإمي كمان، أنا مثلاً عشت طفولة حلوة كتير، عندي يعني علاقة مع الأرض حلوة كتير. عندي خيين وأربع خيات. بمرحلة، بال 92، او بسنة ال 90 نقلنا على بيتنا الي هوي يعتبر أقرب منطقة للموقع الاسرائيلي. كنا مضطرين لأنه كان صرلنا أكثر من 16 سنة نحنا عم ننقل من بيت لبيت، وأجار وهيك. تعرض تعرض حد بيتنا للقصف كتير، وتصارب بي وضل 10 ايام بالجامعة الاميركية وبعدين استشهد. خسرنا بيي كنا نحنا مثل ما عم نحكي ستة، كان فلاح، وطبعاً الأمور الاقتصادية صعبة.

[تضيف وفاء كتابة بعد أن قرأت التفرغ] والتجربة إلي عاشوها أهلنا من خوف علينا كأولادهم عشناها مع أولادنا لما يبش القصف لوين نهرب، كيف نتخبي—يعني بنتي خلقت بال 95 كان عمرها 3 سنوات وتصبح بدها تقطع عند بيت جدًا او على الدكان القريب قلها شو بتعملي اذا بلشوا رصاص، مرات تغير رأيها ومرات تقلي بتخبي عندهم بالملجى واذا كنت عالطريق بميل عند بيت المختار، وهيك إشيا نتأخر أحياناً بالوصول المدرسي لأنه قصف. ولما ولد ابني بال 2000 على رأس السنة إجوا رفقاتي يباركوا وبلش الرصاص والقصف على الضيعة وعلقوا عندي ونزلنا على ملجأ الجيران، الحالة رعب، صار خوف ومسؤولية.

ن.ر. [00:04:49]: بتوصفيلنا الضيعة كيف كانت، مثلاً، إنتي قلتي بيك كان مزارع وإمك. شو كنتمو تعملوا مثلاً؟

و.ف.ا. [00:04:56]: يعني أنا مثلاً بتذكر إنه كنا نترك إختي الكبيرة بالبيت مع تنتين من خياتي الصغار، لأنه كانوا أصغر، وروح أنا وتنتين من اخواتي الصبيان ووحدة من البنات، نروح مع أهلي عالحقلة، كانوا وقتها يزرعوا بصل بندوقرة، كانوا يزرعوا فجل، شو ما يكون في مواسم يعني. نساعدن، نشوف علاقتن، يعني اختبرنا علاقتن بالأرض، وحبن لهيدي المكان، وتعلقن فيه، وهيدا مثلاً من الأشياء الي هني تركوها، أثرت فيي كتير.

ن.ر. [00:05:33]: شو أكثر ذكرى بتخطر على بالك، لما تتذكر طفولتك؟

و.ف.ا. [00:05:37]: يعني بتذكر مثلاً كيف وقت إنه مثلاً كنا نطلع البصل وكيف كنا نحمله رباطات ونرجع نجدله، ونرجع بعد فترة لحتى يصير، شو اسمه الشوشة الي عليها أحمشة وينقام وينباع، أو مثلاً بمرحلة تانية كان في زرع، أو المرحلة القبل عن الدخان، أنا مش واعيتلها. كانوا أهلي يحكوا إنه كانوا يزرعوا دخان، وقديه كانوا يتعبوا ويروحوا، أنا مش واعيتلها. بس من – يعني من وقت ما نحنا صرنا نعارك معهم بالحقلة، صاروا يزرعوا أنواع الخضرة الي هبي تعتبر سهلة، مثل البصل لنفترض، أو مثل مواسم الملوخية، أو بندوقرة، أو الخضار ليعني موسمية تُعتبر، وطبعاً عم قلك تعلمنا منن، وطبعاً من بعد استشهد الوالد اضطررنا نترك بيتنا

ن.ر. [00:06:32]: إمكن أخذتكن؟

و.ف.ا. [00:06:34]: إيه نحنا يعني أخذتنا امنا، رحنا قعدنا ببيت بقلب كفرمان. بس طبعاً، صار ما عش في امكانية نوصل لأرض نزرع وهيك، فاضطرت إمي تشتغل بمخبز. هيدا المخبز بيعمل مشاطيح وخبز مرقوق وهيك، ضلنت تشتغل فيه على

مدى أكثر من 15 او 20 سنة. طبعاً بيبي استشهد كان عمره 49، نحنا كنا 6 ولاد، كانت الصغيرة فينا عمرها 12 سنة، طبعاً، كانت عم تتعب لهاي الطفلة ألي عمرها 12 لحتى تؤمنها، تعبت ماما قدامنا كثير، ضحت كثير بوقت يعني تحرم حالها تقدمنا، هي مثال أعلى، وما بيحي مثلها أكيد، ما بتتكرر، يعني شخصيتها ما بتتكرر، عندها عفوان، عندها حب للأرض، عندها كرامة. ما بتقبل حدا يساعدنا أو يعطينا شي شفقة، أو حياً بمساعدة أيتام، لأ ما قبلت. يعني اشتغلت وأنا كنت بمرحلة التيرمينال [Terminal] صرت أنا كمان، رحت أنا كمان صرت اشتغل بالسوبرماركت، وصرنا نتساعد، وخبي كمان راح صار يشتغل بالباطون. وصرنا عندها 3 الولاد الصغار، أو الـ 3 الصغار هني ألي مضطرين يروحوا مدارس، منأملن حاجياتهن واشيا مثل هيك، وكمان ضلينا مصرين يعني، حتى إمي مصرّة إنه كل، إنه طالما إنه انتو فيكن تتعلموا، روحوا جامعات حتى يعني ما تتأخروا ما تتوانوا عن هيدا الأمر. مثلاً أنا هيدا الشئ مثلاً من الأشياء ألي كانت هيبي وبيبي كانوا مصرين عليها، يقولولنا ما تهكلوا هم إنه نحنا من وين بدنا نأملنن مصري، قولوا نحنا بدنا نتعلم، ونحن بضرهكن، نحنا قدامن. فهاي من الأمور ألي بتخليكي إنه إنتي تفكري إنه، لما استشهد بيبي مثلاً، وإمي ضلّت عنفس الفكرة، قول أنا بدي حقق طموح هني كانوا يحبوا إنه هني كانون يتعلموا، بس ظروفهن كانت قاسية وما كفوا، فأنا بظروف كثير مثل اخواتي يعني. أنا ارتبطت مع زوجي بال 93 \_\_\_\_\_

ن.ر. [00:08:58]: كيف تعرّفتي على زوجك؟

و.ف. ا. [00:08:59]: زوجي هوّي يعني، رفيق الصغر، أهلي وأهله بيشتغلوا بنفس المجال، الزراعة. نحنا ولاد ضيعة وحدة. وشو اسمه ماما صارت تشتغل مع أهله، أهله هني أصحاب فرن، وصارت تشتغل مع بالمخبز، طبعاً هني وماما كانوا يشتغلوا يعني بنفس الوقت يعني، مش إنه هني أصحاب الشغل وماما عندن، لأ يعني هني تقعد حماتي مثل ماما قاعدة على الصاج، يخبزوا قبال بعض، فمن الأساس علاقتنا فيهن علاقة، كيف بدّي سميتها \_\_\_\_\_

ن.ر. [00:09:40]: مودة.

و.ف. ا. [00:09:41]: ألفة ومحبة من الأساس. طبعاً تعرّفت على زوجي، وصحتلي وظيفة بمدرسة، كنت بعدني خالصة بس تيرمينال. زوجي من ميل وإمي من ميل، إنه لازم تكفي جامعة.

ن.ر. [00:09:58]: خلصتي تيرمينال [Terminal] وبلشتي تعلمي يعني؟

و.ف. ا. [00:10:00]: صح.

ن.ر. [00:10:01]: شو علمتي؟

و.ف. ا. [00:10:03]: ----- كنت عم علم، علمت رياضيات [Math] بالمدرسة بالمقاصد بالنبطية.

ن.ر. [00:10:09]: إنتي بأي مدرسة تعلمتي؟

و.ف. ا. [00:10:12]: انا اتعلمت بالمدرسة الرسمية بكفرمان، وبالمدرسة الرسمية بحيطورة، يعني مرحلتين \_\_\_\_\_

ن.ر. [00:10:18]: اه بجزين؟

و.ف. ا. [00:10:19]: بمنطقة جزين. طبعاً هيدا الدفع من والدتي ومن زوجي من ميل، على إنه ما توقفي عند إنه ما معك، ما تخلصي جامعة، لازم تخلصي جامعة. انا كنت روح على مدرستي، ارجع عندي ولد، أو شي، "ما تهكلي هم، ما تهكلي هم عملاّن الأكل، انتبهي بس إنتي ورايحة وارجعي". وصرنا نفتش بالجامعة شو في عنّا اختصاص ما يكون بده حضور كامل، لأنه ارتباطك بشغل وارتباطك بعيلة، بحفدّ عليك بحدد عليك الوقت الخاص ألي بدك بتخليه لإلك. وبالنبطية ما كان في جامعات أبداً، بهيديك الوقت، فكنت مضطرة انزل على صيدا، صرت فتش شو، لاقيت إنه بعمل اختصاص جغرافيا، يعني ألي حد ما أنا بهواه شوي \_\_\_\_\_

ن.ر. [00:11:15]: يمكن إنه مرتبط بالأرض و-----

و.ف. ا. [00:11:17]: يعني ممكن هيكي، هيبي جزء من الشغلات. فعملت هيدا الاختصاص وجزء منه إنه مثل ما عم قلّك، إنه هوّي اختصاص ما بده حضور إلزامي 100%، عنده مادة اساسية كانت إحصاء وقتها، كان إنه الها حضور، لأنه حساب. فصرت داوم يوم، أو مرة يوم بعد الظهر حسب جام— مدرستي، وقطعنا المراحل طبعاً مع وجود صار ولدين يعني، مش بس ولد. لمّا انا اتخرجت كان ولادي ولد يعني عليّ ولد على ايدي أو عمره بالسنة او 2، والبنيت كانت أكبر شوي. بس طبعاً، يعني مثلاً لاقيت صعوبة، إنه إيه، بتصيري تحسّي وقتك ضيق، عم تركضي، بدك مدرستك، بدك بيتك، بدك ولادك، بدك... بس طبعاً في ناس حواليك عم تفهم الفكرة لإنتي ليش عم تروحي أو عم تغيبني، بيدفعوكي لقدام، "إيه معلش تعلمي، شو عاملين اكل، تهكليس هم، يلا روجي" \_\_\_\_\_

ن.ر. [00:12:22]: في حدا عم يحفزك.

و.ف. ا. [00:12:24]: إيه، "ولادك بقلبننا"، إنه إن كان مرت عمّي من ميل ولّا إمي، ولّا زوجي، كانوا حدا عم يدفعني لقدام إنه انا كمل، إنه أخذ ليسانس [License].

ن.ر. [00:12:37]: كنتي، كان حلمك تكوني معلمة أو؟

و.ف. ا. [00:12:39]: ليكي بالصدفة أنا رحت تعليم. أنا كنت قول إذا بدّي أعمل، بدّي أعمل محامية، عشان انا ما بقبل شوف حدا قدامي هيك مظلوم، بدّي دافع عن هاي الناس المظلومة، هيك فكر إنّي قول، يعني بفكر بدّي أعمل محامية، ما

بدي. بس طبعًا بتمرق عليك ظروف بالحياة بتفرض عليك أمور، بس انا بأول سنة رحيت فيها تعليم، حسيت حالي إنه أنا تعبانة شوي، بعدين صرت حسّ حالي، إنه أنا \_\_\_\_\_  
ن.ر. [00:13:08]: أيه صفوف علمتي؟

و.ف.ا. [00:13:09]: ابتدائي، المرحلة الابتدائية، الحلقة الأولى والثانية. بعدين صرت حسّ إنه انا هيدول الولاد بيحوا لعندي مثل العجينة، يعني بتشكيلها وبتكبريها، صرتي سنة مع سنة صرتي بتلمسي الولد إلي اجا لعندك ما بيعرف شي، واتخرج عندك عالسادس، إنه عطيتيه كميات معلومات، وفدتيه وسندتيه، وعم تأهيله للمستقبل. صرت حبها، صرت حبها يعني، وتعلقت بمادة الـ [Math] مع إنها بعيدة شوي عن الاختصاص. بس، لحتّي إنه يعني، صرتي من 25 سنة انا بعلم بالمدرسة، بعلم [Math] ولا مرة كان في هيك مواقف نافرة أو اعتراضات على طريقة الاعطاء او على إنتاجيتنا، وكنا نحنا وبالمدرسة كل شي تمام ومرتاحة بشغلي كشغل و----

ن.ر. [00:14:06]: بتتذكر شي عن الحي إذا رجعنا هيك لورا؟

[00:14:08]- و.ف.ا.: إذا رجعنا لورا، بتذكر الحي، إيه بتذكر كثير مثلاً، بتذكر اشيا كثير كنا، مثلاً، قدام الباب كان عنّا شجرة أكيدينا، معلقين فيها مرجوحة. نتمرجح فيها أو نعمل بيوتنا حوالين هالأكيديناية بالحقلة إلي قدام الباب. جنب الزريعات، إنه نصف حجارة، هاي غرفة النوم، وهاي غرفة القعدة، ونلعب بيت بيوت، او إذا طموحنا أكبر يعني، انا معلمة مدرسة، نحط لوح ونكتب على اللوح قدام الولاد الباقيين، و ههيك اشيا. وفي عنا شغلات حلوة كثير استمتعنا فيها من عمر، انا مثلاً من عمر 4-5 سنين انا اتسجلت بكشاف \_\_\_\_\_

ن.ر. [00:14:57]: كان في كشاف؟

[00:14:58]- إيه كان في كشاف، تابع لوزارة التربية إلي هو كشاف التربية. هيدا الكشاف برّي على الوطنية وعالأخلاق، وعلى محبة العالم ومساعدتها، وعدم الانبهار بالاحزاب والتبعية لإلها. من أروع السنين لمركت بحياتي، من عمر عم فلك 4-5 سنين نحنا كنا نروح على كشاف جراميز صغار ويعلمونا، التحية للوطن والنشيد والوقوف احترام لإلوا-- الحسّ الإنساني بغيرنا، الصداقة، المحبة، الإلفة، هو كلن كانوا اشيا موجودة نحسّها بالكشاف نستمتع فيها، انا بقول يا ريت هلق بيستمتعوا ولادنا بجزء بسيط من إلي نحنا عشناه او لامسناه او عايشناه.

ن.ر. [00:15:51]: يمكن لإنه الكشاف صار ديني أكثر، ما يعرف؟

و.ف.ا. [00:15:56]: يعني مش بس إنه، مش بدنا نقول مش بس ديني، انا يعني مثلاً بعده عنّا الكشاف، وبعده بيعمل نشاطات، وبعده يعني ما فينا نظلمه بنشاطه وبقويته. لكن الناس تغيرت، أطباعها، وطموحاتها. يعني هلق معاش تلاقى واحد عم يعمل. عمل خير لأجل الخير، صاروا نادرين جداً. إذا بتعمل شغلي، مدري شو المطلوب من وراها، يعني صارت الناس \_\_\_\_\_

ن.ر. [00:16:25]: مادية أكثر.

و.ف.ا. [00:16:29]: إيه ما حتّي عندها، عندها نوايا 100% صافية. صارت تفكر إنه أكيد في شي من ورا هل الشي إلي عم يصير، ويعني هيدي الامر لازم صارت الناس كلها لامسيتها، اختلاف الاخلاقيات، والتعاطي مع العالم. يعني كانت الناس مثلاً تلقى مزح من بعضها، كانت الناس تلقى طلبات من بعضها، كانت الناس تتحمل بعضها إذا بأزمات معينة. هلق يعني ما فيكيش تقولي للواحد جملتين، ببيكون خلص، او ببيكون حتّي ماخذ عنك \_\_\_\_\_

ن.ر. [00:17:04]: أحكام سابقة.

و.ف.ا. [00:17:06]: بيطلق، يتم اطلاق أحكام سابقة. وأنا مثلاً، نحنا عيلة مثلاً منحاول إنه نحنا نكون على حياد، نحنا بالسياسة مش مسيسين، ولكن عنا مشكلة إنه نحنا منقول للأعور أعور بعينك، وهوني إشكالية هيدي الامور. بتصيري تحسّي الناس إنه لأنك ما سايرتيها، بس مش كل الأشيا فيكي تسايري فيها. في امور مسلمّات، لازم الواحد يقول هون في صح، وهون في غلط، فانطلاقاً يمكن من هيدي الشغلات بتصيري تشوفي تحسّي حالك كأنك عم تراقبي الشواذات مع إنه إنتي مش قصدك هيك، بس صارت البلد رايحة أكثر نحو إنه الأغلب الأشيا لموجودة قدامك صايرة شواذات، مش عادية [normales].

ن.ر. [00:17:56]: عادات تقاليد مثلاً كانت تصير من قبل، إذا بتتذكرني؟

و.ف.ا. [00:18:02]: إيه مثلاً كان في كثير شغلات كانت موجودة هلق بطّلت موجودة. مثلاً-عادات زيارات العالم التلقائية من دون موعد مسبق، وضرب أخماس وبأسداس كانت شغلات موجودة وتعمل على وجه البسيطة، هلق لا، إذا بدك تروحي، او بدك تيجي بدك تعمل 100 اتصال، وهيدي وحدة من الأشيا إلي بتزيد، في تفرقة هون، غير ما إنه يكون فيها إلفة، أو تقارب. بالنسبة لمثلاً يوم إلي يحوشوا زيتون يقولوا يوم العونة، نتساعد كلنا، نقطف زيتون، انا بتذكر كنت صغيرة، يقولوا اليوم على مثلاً البيدر عند فلان، بدهم يجدلوا بصل، إلي عنده وقت ينزل، ننزل نساعد العالم، يعني هيك لأجل إنه نحنا اهل وجيران مغلوبين بالموسم عندن، "نزلوا ساعدوهن"، ننزل نساعد. يمرق فترات، مثلاً هالشغلات الرائعة إلي كانت تكون، مع عزّ أزمة القصف والضرب، يصير مثلاً بيت صار عنده قصف وتتجمّع العالم، والشباب إلي نحنا أصحاب نحنا وياهن يجبلوا الباطون ويعمرّوا الحجر \_\_\_\_\_

ن.ر. [00:19:24]: والقصف يكون بعده.

و.ف.ا. [00:19:27]: حتى لو القصف بعده، او خلص، شي إنه خلص، يعمرولهن البيت يساعدهن لحتى يكونوا عم يحسوا يرجعوا بعدين بالامان، يعني كانوا يلاقوا بيئة حاضنة لإلن رغم المصاعب إلي كانت تكون موجودة. مرق علينا ظروف صعبة، بالقصف كثير بشعة، بس إنه كانت التكتاف إلي كان موجود، الهيك، كان يخليكي إنك تحاولي تمرقي بهاي الأزمة بأقل خسائر. طبعاً اني عابشت مثلاً أكثر من مرحلة أكثر من شغلة مثلاً، الناس استشهدوا قدامي

ن.ر. [00:20:03]: كان في احزاب؟

و.ف.ا. [00:20:09]: إيه أكيد، إيه أكيد، كفرمان مشهورة، في مشهورة باحزابها وبجمعياتها وبأندياتها، بكشافتها، يعني بتعدّي بال

ن.ر. [00:20:14]: بقولولها كفرموسكو او شي كانوا

و.ف.ا. [00:20:16]: هلق هوي كان في بفترة من الفترات، طبعاً الحزب الشيوعي اله 85 او أكثر صرله بالعمر بالنضال، جدودنا أو بيبي أحد المناضلين الشيوعيين، عمي أحد المناضلين الشيوعيين، طبعاً كانوا يحاولوا يتخلصوا من الإقطاعية، كانوا يحاولوا يتخلصوا من الظلم إلي بيوقع على بعضن، طبعاً كان في هون حكم إقطاعي موجود، كانوا يحاولوا ياخذوا ممن انتاجية أراضيهم و هيك. فكانوا جدودنا يوقفوا بوج هيدي الأشياء ويتكاتفوا مع بعض ويساندوا بعض، ومن وراها نشأت وزادت وكبرت هيدي الفكرة إلي هيبي بنقول إنه كلنا بحقلنا نعيش بمساواة وكلنا بحقلنا نتعلم، وكلنا بحقلنا بفرص شغل، وكلنا بحقلنا فانت يعني هاي انا حدا مش خبير بالسياسة، لفلك مثلاً، إنه الأنظمة، شو بنص عندن الانظمة والقوانين كحزب حزب. ولكن انا بقول إنه كل حدا يحاول يرفع الظلم عن الناس الموجودة انا معه. كل حدا يحاول يزرع خير، وكل حدا يحاول يكون بلده، يعمل بلده احسن، انا بمد يد العون. مين ما كان يكون. بعيدا عن اي انتماء سياسي، يعني حتى هلق، انا بفكر إنه هيدي الفكرة موجودة وبفكر فيها وبشتغل على اساسها ومن وقت انا يعني هيدا التوجه الانساني موجود بحياتي، من وقت، وبعيد.

ن.ر. [00:21:55]: كنت تشاركي شي بمظاهرات مثلاً أو؟

و.ف.ا. [00:22:01]: لأ ولا مرة.

ن.ر. [00:22:02]: لحزب شيوعي؟

و.ف.ا. [00:22:03]: لأ ولا مرة.

ن.ر. [00:22:04]: اجتماعات؟

و.ف.ا. [00:22:06]: لا لأ ولا مرة— ليكي شو، انا يعني خلقت بمكان في ظروف سياسية، وفي احزاب متنوعة ومتعددة، وبيبي حدا حزبي. ما بعرف ليش، ما حسيت حالي ولا مرة حدا سياسي مثلي، او شي سياسي مثلي. انتماؤنا للكشاف بعدنا عن أكثر، مرقت فترة مثلاً اتطوّعت بالصليب الاحمر، كمان هيدي الشغلة بتلعب دور إنه انت تكوني، تكوني قائدة كشاف، والناس إلي موجودة معك من كافة الاطراف السياسية مرات او حتى لو من طيف سياسي واحد، بتحاولي تكوني حيادية او بتحاولي تكوني عم تمشي تشوفي تصوبي ع هدف وتشتغله من دون ما تكوني عم تنجحي حزب او عم تمشي سياسة حزب، يعني إنتي عم تعملي لفكرة، هيدي الفكرة ليدك تتجحيها، مش توصلي حزب لأي شي ثاني. فانا مثلاً، كمان اشتغلنا بموضوع الكشاف نشاطات كشفية، كنا نشغل، على رغم من وجود اسرائيل، نعمل كرمس، نعمل مخيمات، نعمل دورات فوتبول، ندعي فرق ثانية. طبعاً، مرات يعني ما بين القنصة والقنصة تظبط الامور معنا. مثلاً الكرمس ل نعمل وإجا عليه ناس بطريقة مش طبيعية، مع رغم وجود اسرائيل على اطراف كفرمان، بيندقله النوبة بعدن صورته والفيديوهات تاعيله موجودة، والناس تقلنا "يا عمي كيف بتعيشوا انتوا!"، مثلاً كنا نضهر. انا ب 93 عم قلنا ارتبطت، كنا نضهر انا وخطيبي، انا وجايي حظ ايدي هيك على صدري، وقول الله واعلم إذا نحنا وفاينتين هلق إذا بدها تجي شي رصاصة علينا لأنه الموقع قبلنا

ن.ر. [00:24:13]: كان في حالة خوف.

و.ف.ا. [00:24:15]: حالة خوف ورعب، توصلي بتوصلي على بيتك بتصيري تحسي حالك إنه انت بأمان وبترجعي بتعيشي كل امور حياتك بشكل طبيعي. يمرق بوقت خصّات، يعني يمرق قصف، يمرق ناس استشهدت عم قلنا بين ايدينا، يعني وحدة من الوحدات، انا قبل ما يستشهد بيبي، جارنا، كان كنت واقفة انا واياه، وهو نازل حامل ملوخية هو ومرته، رايح يزرع الملوخيات. وخلال دقيقتين صارت تعيطلي مرته من تحت إنه "بليز تعي بليز تعي خدينا على المستشفى". نزلت [بصوت المرأة التي تطلب النجدة] نزلت انا لاقيته هو مستشهد بأرضه وهي متصاوبة وامها متصاوبة وبنتها متصاوبة، حطيتن بالسيارة مثلاً واخذتن على المستشفى، هيدي مثلاً وحدة من الشغلات إلي انا ما بنساها بحياتي. وبتبعث فيي قهر قديش اسرائيل عملت فينا، وبتخليني يعني اتشبت أكثر إنه انا ابقى ببلدي واتي ما اتركها، وزادت الامر أكثر عقب استشهد بيبي، يعني كمان، بيبي حدا من الاشخاص إلي كان متكّمش بأرضه، يحب الوطن، يزرع فينا مبادئ لهيبي انا عم احكيك عنها انا أكيدة هي نتيجة تأتري فيه، بحكيه بظموحاته بأمره. إيه هيك بالغر راج. طبعاً في ناس كثير استشهدت كرمال هيدا الأرض وحررتها. والله يعينا نحنا، او الله يوجه او الله بيعت التفاؤل او بيعت النور على عقل هيدي الناس إلي استلمت هيدي الأرض إنه تحافظ عليها، وإنه تكمل بإلي هني دافعوا عنه. لأنه كمان النضال او الحفاظ على الأرض مش بس إنه نحنا نحمل سلاح، ونقوّص على العدو الاسرائيلي، لأنه ممكن يجيكي العدو ب 100 طريقة، او ممكن يخرب

ن.ر. [00:26:21]: مزبوط، في كماله يعني لبعدين.



و.ف.ا. [00:26:24]: فيه ممكن يخرّب عليكى بأرضك. يعني مثل هَلَّق هاي الحالة إلي هَلَّق منقول موجودة، حالة السموم إلي كَبُوها بالفدائف العقودية وغير العقودية، هاي إلي تعرضت لها ضيعتنا او قرى لبنان كلياته، منطقة النبطية او الجنوب أكثر شي. هَلَّق نحنا عم نلاقي فيها امراض عَنَّا وامراض عند اصحابنا ورقفاتنا وإلي حوالينا. فهيدي كلها إلهَا أثر، نحنا ما لازم نزيده نحنا لازم نخففه. وانطلاقاً من هيك، مثلاً إذا بدك تيجي تفكري، إنه أنا وحدة من الأشياء إلي بتأثر عليها وبنقهر عليها ويمكن هي محفدة لمشروعى إلي بلشته كمشروع بيئي، إنه انا بقول إنه أنا إذا بدى هيدي الأرض إلي اخدتها نتيجة جهود شهداء، ونتيجة ناس راحت دمانها بالأرض، واينعت اقحوان، اقل امر إنه أنا حافظ عليها نظيفة، حافظ عليها مش ملوثة. نحنا لأ، نحنا اخدنا كل شي من بعد ما راحت اسرائيل، اخدناه نظيف ان كان الاراضي الجبال والأنهار وعشنا فيها فساداً، وهيدي الطامة الكبرى، وإلي ما قدرت تحققة اسرائيل بالحرب وقوة السلاح، نحنا حققناها اياه بجهلنا، بـ انا بقول جهلنا جهلنا، يعني انا بقول حتى لو بدى عدّ حالي وحدة منهم، نحنا جهال بحق حالتنا، شو عم نترك للأجيال، لولادنا، قديّه ضحوا اهلينا وشو تركولنا، ونحن ما عم نفكر شو عم نترك لولادنا، كل واحد بقالك ليش هيى وقتت عليّ؟

ن.ر. [00:28:17]: ما في حسن بالمواطنة بتحسّي؟

و.ف.ا. [00:28:18]: ابدأ، فُقدت، فقدت. صارت العالم، كل واحد بيقول، من بعد حماري ما ينبت حشيش. كل حدا عم يفكر بمصلحته الضيقة الخاصة، حتى لو كان فيها ضرر على العام، ما عندن هيدي التوجه نحو هيدي الأشياء— شو بعد، شو بعد بدنا نحكي؟

ن.ر. [00:28:47]: كنتو تحكوا شي عن الدين بالعيلة مثلاً، بتتذكري؟

و.ف.ا. [00:28:51]: اه، ليكي شو، انا مثلاً ربيت ببيت امي بتصلّي، وببي كان حبيب كيف، إذا بدك تقولي. بس انا مثلاً بقول بيى كان انساني لأقصى الحدود، كان خلوق لأقصى الحدود، بعدن لحديت هَلَّق مين ما ببسألني انت بنت مين بقول انا بنت فلان، بقولو الله يرحم روحه، هيدي الاخلاقية الموجودة انا يعتبرها هيى الدين، انا بالنسبة إلي الدين هيك عندي. ربينا بهيدا البيت من قبل هذين الشخصين، إن امي او ببي، ما يقبلوا إنه نحنا نظلم حدا او ناخذ حق حدا او نتسلط عددا او نوذّي حدا. بالعكس، كانوا يعلمونا إنه إذا في حدا قدامك تعرض للظلم، بدكن تساندوه. كونوا معطائين، كونوا خيريين. وين ما بتكونوا كونوا انتو قدوة قدام غيركن. تعلمنا هيدي المثاليات من هيدول الشخصين وبناء عليه صرت، أكيد هودي بأثروا وكثير، وخاصة انت ما عم تتعلميهن شفهيًا، انت عم تشوفيهن ممارسة يهودي الشخصين، يعني اني لما بشوف إنه امي لما يكون عنا صحن، امي، شو ما طبخت، تحملني صحنين، او تحمل إلي انا صحن ولخيي صحن. جارتنا بتحب هيدي الأكلة روح حطها، او نيتا بتحب هاي الأكلة روح حطها، هيدا مثل بسيط على إنه هيى عم تشارك حتى الصحن إلي هوّي اليومي مع جارتها او مع قرابتها او مع اختها، لأنها فكرت فيها إنه هيى بتحب هاي الشغلة، وانا عملتها وعم بذكرها. قديّه الأمر بسيط، بس هوّي، هيدا جوهر يعني إله إله قيمته كبيرة، بخليكي إنتي تفكري، إنه المشاركة هيى الحب، المشاركة والعطاء للأخر هيى إلي بتخليكي تحسّي بسعادة وبعدين إنه، انا مثلاً ولا مرة إمي مثلاً سمعتها قالت إنه مثلاً زوجي ما جبلي ذهب او ما جبلي خاتم او ما جبلي، كانت تفكر بطريقة مختلفة. عشان هيكي انا مثلاً بعتر هاي الأشياء إلي هي تُعتبر كماليات ما الها قيمة بالحياة ولا انا قناعتي، حتى هَلَّق بقولولي سيارة، انا بقول سيارة تاخذني وتجيبي وما تقطعني، هيدي كافيتيني. والواحد بفكر إنه مش ضروري يكون عنده شي للبرهجة، إنه كافي، والقناعة هيى سعادة بحد ذاتها، إنه الواحد طالما عينه بهاي بهاي طالما إنه ما بيرتاح. هيدي علمونا ايها، إلي عنا موجود الحمد لله، أني بسمعش، بتضل بإدني كلمة امي، بقلها انا ماما نحنا بدنا محتاجين هيك؟ انا بنتها بدقلها من الشغل او مثلاً من بيتي بقلها ماما بجيب هيك، بدك هيك؟ بتقلّي الحمد لله يا ماما، البيت ملان ما بدنا شي. هاي الكلمة، بحد ذاتها، الحمد لله البيت ملان، طيب انا بطلع مرات كثير ما بلاقي عندها فواكهة ما بلاقي عندها كذا ما بلاقي عندها كذا، بقلها طب يا ماما، بتقلي الحمد لله، ما نحنا مش حنموت بلا هيك. هيدي بتخليكي إنتي تقنتعي إنه في اشيا كثير بالحياة لها اهمية أكثر من إنه يكون بيتك ملان، شو ما، يعني في اشيا بتعبي العين أكثر او بتعبي النفسية أكثر. هَلَّق بالنسبة لعلاقتنا بالدين، إذا بدنا نرجع للدين، انا بقول، ربينا على إنه الدين هو الانسانية هوّي عطاء هوّي محبة وتسامح. هَلَّق بصليّ او ما بصليّ، بصوم أو ما بصوم انا بعتر إنو هولي شي خصوصيات، كل واحد بعبر فيهم بطريقته او بمارسهم بطريقته. طبعاً انا بشوف ملاحظات، كانت موجودة، او كانت في اشيا موجودة او غير موجودة، على أيام عاشوراء ورمضان، لما كنا بالعمر 10 و12 سنة، هَلَّق صارت موجودة، بس للبرهجة، او لـ. يعني مثلاً من المظاهر السيئة انا بعترها، كميات الاكل إلي بتنحط على الطرقات بعاشوراء، كأنه الانسان مانو شايف أكل بحياته. عم تروح ضيعان، عم تنكب وانا بوثق إنها عم تنكب، بينما في ناس تانيين بحاجة لدواء، بحاجة لعلاج، بحاجة لاكل طبيعي بشكل يومي، بعيداً عن عاشوراء، انا بقالك بعاشوراء يمكن فش حدا بيبقى جوعان، وحتى الناس المحتاجة مش كثير بتتشجع تنزل وتاكل، بس إنه خليني قول إنه بعاشوراء وصل الاكل لكل العالم، بس انت لازم تعرف في عندك غير عاشوراء 350 يوم غيرها الناس بحاجة إنها تاكل وتعيش ودواء، انا بقول، هيدي الكميات إلي بتنحط

ن.ر. [00:34:12]: بتتذكري كيف كانت تصير؟



[00:34:13]- و.ف.ا.: كانت عاشوراء، مجلس عزاء بسيط، يندكر فيه شجاعة الإمام الحسين، يندكر فيه كيف هوي قودة، كيف اخلاقياته، كيف لازم تتمثل فيه. بينما هلق مثلاً انا، بعرف إنه في ناس، ممكن إنها تعمل وليمة ما فتح ورزق، وايدھا بالسرقه غاطسة وهيدا تناقض بفكر -- انت مين عم ب --؟ كأنما صارت

ن.ر. [00:34:50]: صار في انفصام بين القيم والمظاهر.

و.ف.ا.: [00:34:51]: ليكي شو، اشعر انا، هيدا شعور خاص، اشعر انا، إنه اكثر الاحيان في ناس بتروح على الجامع لتصلّي، او بتعمل او بتعمل، لأنها تشعر بالذنب، لإنه في شي عملته، وهي عارفة إنه هوي سيء، او هوي أدت فيه حدا، او عملت شي سرفت فيه حدا. أشعر، هيدا انا احساس عندي. هلق انا بقول كل انسان على دينه الله يعينه، انا بعمل واجباتي كإنسانة وبقول إنه نبينا محمد حثنا أول شي على الانسانية، والانسانية يعني هاي ولا ممكن حدا يوصلها يعني، قد ما بدك تعلي وتتسامي وتطمحي، ما بتوصلي لها، وبقول إنه هي الانسانية الاخلاق المحبة هوي هني، انا بتتمثل فيهن، بحاول قدر استطاعتي إنه انا اشتغل على أساس. يعني مثلاً وحدة من الشغلات إنه انا مجرد ما حس إنه بالمسؤولية، إنه أنا إنسانة بهيدا المجتمع، حسيت بالمسؤولية إنه انا ما لازم ضلني مكتوفة الايدي، مثل الكل، قدام الموضوع البيئي مثلاً وبناء عليه مثلاً انطلقت بموضوع

ن.ر. [00:36:08]: كيف بلش اهتمامك بالمجال البيئي؟

[00:36:13]- و.ف.ا.: انا يعني بيفتلي نظري كثير الأشياء، الشغلات إلي نظيفة وإلي مرتبة والشغلات الوسخة والعجقة والشغلات لبتؤدي والشغلات المضرة، يعني من وقت بعيد، هلق هو ليكي إلي بيربي بالكشاف وبيربي على انظمة وقوانين وهيدا صح وهيدا غلط، وهيدا نظافة وهيدي ترتيب وهيدا. يعني نحنا مثلاً بالكشاف كنا نمشي، نعمل خيم، ونعمل نمرق بين الحجارة كأنها هي طريق. ما كان في بوليس، يوقفنا إنه ليش مرقت هيك وما مرقت هيك، بس كان عنا شي براسنا يقول إنه نحنا علينا ان نمشي بنظام، عالقانون، لأنه القانون شي بريحنا، ولصالحنا. وصرنا نربي على هاي الشغلات، هوي من الأشياء، هون لما صاروا من عادته ومن تقاليده ومن قناعاته من افكاره لبيمشي وبيشغل على اساسها وبيصير يطور بحاله. هلق طبعاً الموضوع البيئي، موضوع إذا بدك أخذ حق، هلق تطور أكثر او بمعنى صار مسلط عليه الضوء أكثر، لأنه صارت حياتنا معقدة أكثر. يعني انا مثلاً بتذكر إذا امي راحت تشتري لحمه كانت تشتري هالحمة أوكي بورقة وكيس، وإذا اشترت اغراض بتحط مرآت الخضريات كلها مع بعضها، او بسلة او بشنطة. كانوا ينزلوا على سوق النبطية، ياخذوا معن شنطة قماش، يجيبوا اغراض فيها ويجوا، ما حس إنه امي عندها علبه من ورا البيض، وعلبة من ورا الجبنة، وعلبة من ورا اللبنة، وعلبة منهودي البلاستيكيات. هودي مثلاً صاروا المنتجين ليشجعونا نشترى منتجات، صاروا البسكوتة، في احدى البسكوتات مثلاً مغلفة باربع غلافات وكرتونة وحدة سانيتا [Sanita] وكرتونة وحدة من برا عليها ألوان وأشكال، وآخر شي انا بلحظة، إنه انا عم اتكلف حقن، انا دافعة حقن هيدول. برجع بكهم وبكهم وبعصيروا زبالة، وبعصيروا عبء علي. فنحنا عم نمشي ورا الناس إلي عم تنتج هيدي الأشياء، حتى لو اشيا كمالية وما عم بتفيدنا، نشتريتها ومنكركيها ومنكبيها. يعني في كثير اشيا، مثلاً واحد بيشتري كيلو خيار كيلو بندورة كيلو مقته، كيلو لوبية يقوم بحطن كيس كيس نيلون، بيوصل على البيت، بيثيلهم، هول صاروا كياس وصراروا زبالة، يعني انت استعملتهم خمس دقائق. وبعد شوي صاروا زبالة وصراروا عبء عليك. بالقبل ما كانت هيدي مثلاً موجودة، هلق صارت موجودة. بالقبل كانت مثلاً، كل الظروف المحيطة بالموضوع البيئي اقل، يعني انتاجية الزبالة إلي كانت، كانت تكون اقل بكثير بكثير بكثير. كانت مثلاً عنّا الحقلات، يعني طلع عندها خضرة، طلع عندها قشور بطاطا، شوية تحطهم بالحقله، او تعطيهم للدجاجات او شي. فكانت كميات الزبالة اقل، فما كنا نلاحظ قديش كان في ضرر بيئي، او ما كان في ازمة بيئية، وكانت البيوت اقل، وكانت الحقاله أكثر، فما كنا نراقب هيدا الموضوع.

ن.ر. [00:39:37]: كان مرتبط بالقناعة، بتعتبري؟ إنه ما كان في ثقافة الاستهلاك هلق؟

و.ف.ا.: [00:39:39]: إيه هلق انقلبت الأمور. أول شي زاد عدد الناس، تاني شغلة صارت الناس كل شغلة بدها تروح تشتريها، بتشترتها بعلبة مغلفة مرتين او ثلاثة، وحتى بعد شوي إذا حملت ربطة خبز، إلي هي مغلفة بكيس، بترجع بتقالك، حطيلي اياه بكيس تاني. وصارت الناس تعقد تصرفاتها وإشيا، إنه هيك ارتب، هيك احسن، هيك اجمل، وهيك أشيك، حتى مواضيع مثلاً إذا بدك، موضوع ال [souvenir] والشوكولا المزين، وإلي كمان بتتكلف عليه الست، او صاحب البيت، صاحب العيلة إلي اجاه [bebe] جديد، بلا ما يكون إنه هوي يستمتع بهودي المصاري يصرفن على ال [bebe] بغذائه او بحفاضاته او بإشيا، صار يحطن حق بوبونيرة [bonbonnière] 6-7 الاف اقل وحدة يزيتها وضيقها للعالم، وبعد شوي نحنا ناخذها ونشيلها ونكبيها. ما حدا بيحفظ بكميات كبيرة من السوفنير [souvenir] هاي وحدة هاي مثلاً وحدة من الكماليات غلبتنا، "ههبيي! ما بعمل سوفونير معقول!" مثلاً، عم احكي كمثل هيدي العادة إلي اكتسبت، كسبتنا كميات من النفائات كبيرة، عيد ميلاد، او حفلة ما قبل حفلة العذوبية او -- في عنا مناسبات نحنا استحدثناها او حطيناها

ن.ر. [00:41:06]: مستوردها لهيك لمجرد البهرجة.

و.ف.ا.: [00:41:07]: إيه مثلاً حتى إذا بدك لما كان ينعمل الهريسة او ينعمل هاي عالمناسبات، كانت جارتنا عاملة هريسة، "يلا قولو للجيران" كل وحدة تجيب طنجرتها ويتجي او جاط من عندها، هلق "بيه ليه بدي حمل جاط وروح، وجيب هريسة،

لأ"، بروح بجيب علبه البلاستيك، إلي بتسبب لي 100 مرض. انا وعم باكل الهريسة عم بتسببلي 100 مرض، وبس كبتها بالزبالة بتسببلي امراض أكثر. إنه انا ما عم فكر بحالي، صرت عم فكر الناس شو بدها تشوف فيّي. او انا كيف البريستيج [prestige]، او بريستيحي قدام العالم كيف، وهيدا قاتلنا قتل. مش كل العالم بتفكر مثلاً بالطريقة الصحيحة او بالشو الصح لإلي. يعني آخر، هاكي اليوم، نزلت على صفحتي، قتلن غنجوا حالكن وكلوا بقزاز، غنجوا حالكن. اغلب العالم عم تاكل بصحون البلاستيك، شوربا، واكل سخن، من هيدول السلفون-- السلفون او بالبلاستيك الابيض، إلي هوي كله أمراض

ن.ر. [00:42:18]: يمكن بيعتبروه اسهل واقل جلي.

و.ف.ا. [00:42:25]: إنه "انا بدي إجلي بدي خلص وأقعد ارغل" طب خلصي، وخدي نص ساعة، خدي ساعة ورجعي إجلي، وخلي صحتك وصحة ولادك، في صحة ولادك على المحك، او صحة عيلتك على المحك. فبتحسي إنه الناس، لأننا رايحين نتبضع لرمضان، بجيبولك هالصحون والشوك كله كله بلاستيك بلاستيك، يعني في اختلاف

ن.ر. [00:42:46]: في ثقافة غلط.

و.ف.ا. [00:42:47]: اختلاف عادات وتقاليد هيدي الشغلات إلي مرقت علينا. وهيدي زودت أمور إلي هبي عم تنكب بالطبيعة، وإلي نحنا صرنا هلق عم نقدر نلمسها أكثر، إنه صارت زيادة [over]، صارت فوق حدها، وصارت كميات الزبالة عم تكون كبيرة كثير. الاقفاص البلاستيك، او غلانات [gallons] الماي، طبعاً انا بدي هون بدي اذكر، المشكلة بالغلانات وقناني الماي، هو عدم توفر الماي النظيفة

ن.ر. [00:43:19]: كنّا قبل نشرب من الحنفية.

و.ف.ا. [00:43:20]: كنّا قبل نشرب من الحنفية، وطبعاً كان النهر نظيف، ونحن لوئناه، كئينا فيه كروشنا وحفاضاتنا وزبالاتنا، كله بروح على النهر انا شوي، انت شوي، وغيره شوي. لوئنا نهرنا، معش قادرين نشرب من النهر، والمسؤولين عنا مش سائلين عنا، فاضطررنا نستعيض عن بشو، إنه يابا جيبوا قناني الماي. فصرنا عم نكدس كمان كميات هائلة من الزبالة إلي هبي قناني الماي، على أنواعها وأحجامها وأشكالها. حتى موضوع مثلاً عدم اهتمام الدولة مثلاً لنقول بموضوع الكهرباء خلطنا مثلاً إنه نرضخ إنه في موتيرات الكهرباء وملوثات الهواء تاعيلها والموتيرات. فصار موضوع التلوث صار بارز أكثر لأنه صارت كل الأشياء إلي نحنا عم نعملها عم تزيد كميات الزبالة، يعني صرنا نحنا منتجين زيادة عن الحد لكميات الزبالة، هيدا خلاني شوف إنه صار في عنا مشكلة عم نتفاهم، ولازم يفكر الواحد بالحل، وأكثر إنه لما تمرقي ببلد عدد سكانها كبير مثل كفرمان وتلاقي كميات، مثل ما مرق لبنان بهاي الأزمة بال 2016، تجمعت كميات الزبالة بالأكياس البيضا المشهورة وإلي حطوها على CNN و و و

ن.ر. [00:44:45]: هبي هيك فجأة ظهرت.

و.ف.ا. [00:44:46]: هيدي نتيجة إنه ما في حدا عم يهتم بموضوع الزبالة ولا تصريفها وحتى عدم مسؤولية الناس إلي نحنا انتخبناهن ليكونوا مسؤولين، اختلفوا إنه انت بيطلعك حصة بالمعمل أكثر، او انا بيطلعلي أكثر، اختلفوا، سكرنا المعمل، وخلونا نغرق بالزبالة وبعدنا غرقانين. ونحن ساكتين عنهن، وهني مسترسلين. ونحن غارقين بالمشكلة وبعدها ماشية، بناءً عليه، صارت كل ضيعة يمكن تشوف إنه والله بعمل حل خاص، حل ضيعاوي مثل ما بيقولوا.

ن.ر. [00:45:26]: ايمتي انخلق الوعي عندك، إنه صار لازم بصير في شي؟

و.ف.ا. [00:45:29]: بالظبط بالظبط بأزمة ال 2016، يعني مرق شي 20 يوم بكفرمان الزبالة ما انقامت نهائياً، صرنا نحنا ورايحين ونحنا وجايين الزبالة على مداخل البيوت، على جناب الطرقات، ضهر منها الدود، والبرغش ودبان وعقص، وكانت شتا، وطبعاً صار رواج وإلي بدك إياه. صار إنه التواصل مع صديقات لإلي على الخاص، إنه انا بدي اعمل شي بخصوص هيدا الموضوع حتى لو بدي اعمله شي خاص.

ن.ر. [00:46:11]: صديقات من الحي أو؟

و.ف.ا. [00:46:12]: إيه رفقة، قتلهم انا قبل ما بدي اعمل اي تحرك، بدي اطلع عند الدكتورة زينب مقلد، اسألها، الدكتورة زينب هبي----

ن.ر. [00:46:21]: كيف تعرّفتي عليها؟

و.ف.ا. [00:46:22]: الدكتورة زينب هبي أستاذتي، هبي كانت استاذتي بالثانوية. حدا انا بحبه كثير وبحترمه وبقدّر المجهود إلي بتعمله، ونحن ما يعني إلي منحكبه نقطة ببحر العطاءات لقامت فيها. فقصدتها وقتلتها، واخذت منها موعد وقتلتها نحنا بدنا نستشيرك بهالشغلة، وقمنا طلعا وحكيينا، كيفت فينا، "برافوا عليكن وانا يعني هلق بحس إنه انا البذرة إلي انا زرعتها عم تنتج وعم تكبر". عطينا نصائح وإنه كيف لازم نبلس، وأول الأمر، "أبعدوا السياسة واشتغلوا بيبة"

ن.ر. [00:47:08]: ما تدخلوا----

و.ف.ا. [00:47:09]: إيه. يعني ما تكونوا طرف سياسي، لأنه بس تكوني مع طرف سياسي يعني صار الطرف الثاني بدو يحاربك، حتى لو مثلاً إنتي مقتنعة معي بالمشروع، بس انا بمثل طرف سياسي غير إلي إنتي بتمثليه، في ناس بتصير تعمل بالناكواي مش إنه وحتى لو ضد مصحتها، فقمنا نحنا بناءً على هيك، إنه هاي النصيحة، قلنا ما بدنا نخرط ولا مع اي جمعية

موجودة، او نبش من جمعية موجودة، لأنه كله توجه سياسي، او حزب الله، او حزب شيوعي، او حركة، او حتى بعثيين، او المهم، في عنا كثير جمعيات. مهم قلنا منعزل نحنا جمعية بيئة محض، ولكن رح نعلن، قلت انا منعزل اعلان خاص على صفحتي على الفيسبوك، من يحب الالتحاق او شايف رؤية ماء، او شي. حطينا حطيت على صفحتي، خلال 3-4 ساعات صار فيه شي 100 وحدة عاملين شير [Share] للبوست [post] إلي انا عاملته وإنه نحنا مع وملتقي ونعمل على \_\_\_\_\_

ن.ر. [00:48:26]: من كفرمان. وف.ا. [00:48:27]: من كفرمان، عملنا لقاء المهم تحدثنا، الحلو بالي صار هون، إنه اجت إلي من الحركة ولمن الحزب ومن الـ

ن.ر. [00:48:42]: من عدة أطراف. وف.ا. [00:48:43]: كانوا جامعين بطريقة مش طبيعية، قلناهم انا، طبعاً، في شي إنه انا مثلاً سياسياً هون مني مع الحزب ولا مع الحركة، وانا اهلي معروفين إنهن شيوعية. قلت لهن انا بعيداً عن السياسة، انا بدي اشتغل شي بيئي، إلي بتحب تواكب، وتكون معي ايد بايد ويس تلاقيني شديت تقول لأ مش هيك، هدفنا بيئي. الامر 1-2-3 إلي هو موضوع البيئة وموضوع النفايات ونفوت بمشروع فرز، ونفرض على الضيعة كلها، ومنعمل plan خطة منشغل فيها سوا، وإلي عنده افكار بيطرحها وكيف منعزها، وكيف منخلها تنتشر، وكيف منخلتي نستقطب الناس لناحيتنا. فصرنا نشغل على ما بين فيسبوك، بين لقاءات يومية بين واتس أب، وبين هيك، خلال فترة كثير وجيزة كنا 100، كنا 100 صبية. بلشنا كلنا نسحب معلومات عن الانترنت، شو يعني بيئة، شو يعني، نحنا مننا اختصاصيين بيئيين، ولا منعرف شو مخاطر هاي، او شو حسنا هاي، او شي، او كيف منعزل. صرنا نستشير الناس الخبراء بهيدي الأشياء، ونجمع معلومات، وبنفس الوقت بلشنا كل وحدة مننا بيئتها تعمل فرز من المصدر. صرنا نحط كل الأشياء العضوية لحال وكل الأشياء ان كانت بلاستيك او تنك او كارتون، البلاستيك والتنك والقزاز نغسله، حتى ما يجي علينا يرغش ودبان وهيك، ووجود الازمة وطرحنا للحل بهيدا الشكل، في ناس كثير كانت يمكن مش مركزة، إنه والله إيهه في حل، صارت تساندنا، فانطلق المشروع على راس السنة تقريباً، لحد شهر ثلاثة، كنا، صرنا فوق 400 بيت عم نفرز، وكانت الكميات تتجمع عند بيت، بيت صديقنا \_\_\_\_\_

ن.ر. [00:50:59]: كانت الكميات تتصمد بمكان واحد؟ وف.ا. [00:51:00]: إيه كنا نجمع بيوتنا وبعدين لما صاروا كتار قدام كل بيت كل وحدة، في ناس بتقلك أوكيه انا مقتنعة بالفكرة، بس انا عندي اشكالية وين بدّي حطهن، بتحملن جمعة بس أكثر من جمعة ما فييش اتحملن. فصرنا نعمل سيار اتنا الخاصة انا وصديقاتي نجمع هيدي الكميات بالجنينة عند صديقتنا، جنينتها في امكانية استخدامها. نرجع نتصل بالدكتورة زينب ونقلها بعطينا بيكاب [pick-up] الجمعية ياخدهم و \_\_\_\_\_

ن.ر. [00:51:33]: كيف كنتوا تفرزوهن؟ إنه في نفايات عضوية مثلاً؟ وف.ا. [00:51:35]: ما كان حدا يجبلنا نفايات عضوية. نحنا كنا 100 ست عم نشغل، كلنا بيئتنا بيئتنا نشغل على الفرز، يعني انا أخذ الفرزات من عندي مغسلين، جارتني تأخذ مغسلين، يعني ما بدك شي، بس يعني بتحطيهن على البرندة [Veranda] وبتعدي حدهن ولا ريحة ولا شي ولا وسخ ولا شي، وبعدها لحدية هلق منشغل على الفرز من المصدر وهو أهم، إنه إنتي منك مضطرة تجيبي زباله مخبوضة كلها ببعضها وتعددي تشيلي كل شي لحال، انت فيكي قبل ما تخصبهم، انت بالبيت عم تخصبهم ك ست، نحنا لعنا على هيدا الاساس، توصلنا مع الستات، لأنه هبي اساس الفرز بالبيت، صرنا نعمل على إنه كل شي بالبيت ينفرز. فيتروحي إنتي على مركز الفرز، صاروا معربين. إذا بدنا نرجع نعرهم إنه بس لنقدر نحطهم بكياس اكبر، مش بالكياس الصغيرة. وانطلقت الفكرة، وبعدين لما صارت تشوف دكتوراة زينب الكميات إلي عم تطلع لعندها، دقتلي، قالتلي "صار فيكن انتو تستفيدوا من وراهن"، يا عمي كيف بدّي استفيد؟ قالتلي "بتطلعي لعندي بقلك؟". طلعا، كمان عطتني ليستة [list] اسماء، كيف بتصرفي اليضاعة، وكيف شو شو شو. صار بدنا نستأجر محل، طبيب هاي بدها كلفة، مين بدو يدعمك؟ قلنا تشاورنا بين بعض، قال حتى لو نحنا بين بعض دفعنا اجار شي خيلنا نشوف قديش إيجارات المحل؟ رحنا عند شخص، عنده بنايات وهيك اشيا. سألناه، نحنا عنا نية إنه نستأجر عندك محلات، في عندك ارض؟ قال في كثير وبأكثر من مكان. انتو شو بدكن محل شو، قلنا له، شو بدكن تفتحوا؟ قلنا له، إلي بدنا نفتحه شوي غريب، قال شو؟ قلنا له بدنا نعمل هيك هيك، "بتجننه انتو!".

ن.ر. [00:53:34]: أه رخب فيكن. وف.ا. [00:53:35]: "بتجننه انتو!". عطانا محلين، صرنا لحدية هلق 3 سنين مستخدمين هول المحلات، وما منعطيه ولا فرنك، وما بيقل ياخذ ولا فرنك، ويقول مثل ما انتو بتحبو كفرمان، انا عدنان علي احمد بحب كفرمان ع قدكن. مثل ما انتو عم تساهموا انا بدي ساهم. فكانت هيدي مثل ما بيقلوا، السندة الاساسية، الحاج عدنان لولا وجوده واعطاه لهول المحلات، نحنا ما منقدر نمشي. فجمعنا هيدول ال، صرنا نجمعن بهيدي المحلات، واجهتنا صعوبات. أول مركز، أول محل اعطانا اياه، عملولنا مشكل طويل عريض، "إيه بدكن تجيوا الزباله لعنا!". "يا حبيبي يا قلبي، فرز هيدول مش زباله". "اه بدك تقنعيني إنتي!". قام الدنيا جمع اهل البنات إلي حواله كلهن، 3 رجال، منعونا نرجع نحط الفرز. "لك يا خيي، انت اسمعني شو عم بحكي، نزال شوف، وشم وإذا فيه شي، يا خيي جارك عنده معمل حلو قبانا، قبل لأنه شاف، ونحن منحط معقمات

ومنحط ادوية وما منخلي، لا فيران ولا جرادين ولا شي، ولا صراصير لأنه كله مغسل! كله يا خبي مغسل!". يقلي "تسء تسء تسء ما تحكييني شو انا ما بعرف بدك عملي، بكرأ بدك تجيبي النفائات العضوية". لا حول ولا قوة، كانش يفتح، تزكونا المكان، قام الحاج عدنان عطانا بمكان تاني، وقال شو "بعدي عن الشر وغنيله". اقتنعنا بهيك. وطبعاً بتروحي إنتي عم عملي عمليات توعية بالبيوت، صرنا ننطلق بعمليات توعية بالبيوت.

ن.ر. [00:55:19]: **صرتوا تفوتوا عاليوت.**

و.ف.ا. [00:55:20]: مهم. نعمل مثلاً عصرونية نعزمهم لعندي لعند جارتني نعزمهم عند رفيقتي، مثلاً رفيقتي قاعدة بالحي التاني، بتقلهن للجيران انا اليوم عازمتكن على قهوة، على الشاي على الكيك [cake] على كذا، نروح لعندن ونحكيهن إنه ليكو القصة هيك غلط والقصة هيك صح، وهيدي مصلحة ولادنا، وهيدي حياتنا وهيديا سرطانيات وهيدي هيك، ناس تتقبل وتشتغل وتواكب وتتابع وناس تقفك حلّي عني البلدية، شو خصني أنا

ن.ر. [00:55:51]: **"شو واقفة عليّ."**

و.ف.ا. [00:55:52]: "البلدية مسؤولة ما انا عم اعطيتها 75 الف بالسنة على المسقيبات تصطفل تشيل الزباله"، ولك يا عمي هيّي عم تشيلهن للزباله، بس انت عارف وين عم تحطهن عم تطمرهن بالجبل، او عم ينحطوا بميتنا. ما عندهن هيذا الوعي. يعني بمجرد ما إنه الزباله راحت من بيتها للوحده، بتفك إنه انا ما خصني ما دخلني، وفي ناس كانت متفاعلة معنا مثل الحاج عدنان، يعني مثلاً في ناس مثلاً قالت انا كل وقت بدكن كياس كبار للفرز انا مستعدة، يشترونا ويجبولنا اياهن. أكثر من حدن عرض علينا مساعدات مادية، نقله مصاري ما مناخذ إذا بدك شي عيني تقدم. يعني جبنا طاولة كبيرة للفرز وعلناها وجبنا كياس وعلناها، مرة عملنا كياس قماش وصرنا نعلم العالم إنه بس تروحي على السوبرماركت، خدي كياس قماش وجيبي غراضك فيه، وارجعي خديه وجيبي غراضك فيه. عملنا أكثر، حتّى عملنا صفحة على الفيسبوك كمان، منعمل عليها ارشادات بشكل يومي. إيه، اشتغلنا يعني حوالي 60 صبية حملات توعية، مثل ما عم نحكي لقاءات ندوات، بعدين صار يجي جمعيات اجنبية يساعدوا، يعني يطرحوا معنا ساعدتنا جمعيتين وحدة منهن عملنا نحنا وياهن دورات تدريبية على كيف يمكننا نحول هيدي المواد لتحف لشي للزينة دورة اشغال يدوية، عملنا من وراها معرض، واشيا رائعة تماماً، يعني عنا أكثر من صبية مبدعين، شي بيشتغل بالقزاز، وبيعمل عليه [decoupage] وتزيين بالحرانتيق الصغيرة بتصيري تحطها بييتك يعني بتستخدمها وهيّي زينة. او عنا مثلاً صديقتنا بتشتغل بالخشب وما تبقى من تريات او مثلاً إني بيتبقوا من الارغيلة، مع إني بيتبقوا من التريات، تعمل منه [lampadaire] بشكل تاني، عملوا افكار رائعة رائعة رائعة جداً. وحدة منهن هيدي، هيدي مثلاً ليكي شو، هيدي نص ارغيلة مع الـ [lampadaire] مع القزازه تعول الـ [lampadaire] مع القزازه تبع التريا، ركبتهن ببعضهن توصيل ببعضهن بصوروا وكل شي واشكال مثله رائعة.

ن.ر. [00:58:37]: **عجند شو بيطلع افكار عظيمة من ولا شي.**

و.ف.ا. [00:58:38]: مثلاً غلبة الشامبو، هاي غلبة شامبو قصيناها ولفيناها بجفنيص وحطينا عليها زينة، بتحطها لتزيني بييتك، او على طاولة المكتب او شي. عملنا شي مثلها للاقلام، يعني افكار افكار. عملنا معرضين، كل معرض طبعاً يمرق عليه ناس كثير ويمضولنا ويثنوا على العمل إني عم نشغله، صرنا نحاول نسلط الفكرة إنه انت فيك تفرز وتخفف انتاجية البيت. فيك انت تستخدم هيدي الشغلة، هيدي المفروشات باشيا تانية بتفيد، او حتّى في عنا صبية صار مصدر رزق من صناعة هيدي الاشيا. الشغلة الثالثة، انت حتّى هيدي الاشيا لو ما قدرت تصنعها بطريقة تانية، لما انت عم ترجع تبيعها لصاحب للي عنده تنك او إني عنده بلاستيك، او ليّي عنده هيك، انت سببت، يعني عم تعطي رزقة لهو الناس يكفوا حياتهن وحياة ولادهن، ويكفونوا مش محتاجين او ماديين ايدهن او العوز.

ن.ر. [00:59:49]: **في هون معامل بالجنوب بتستقبل بلاستيكات؟**

و.ف.ا. [00:59:52]: ممم ممم، طبعاً فيه، وكثير. يعني بمجرد ما تفوتي بالدومان [domain]، بيصيروا، يعني في مثل المافيا هاي إذا بدك، بس عل الأقل، كوني بشتغل بهدف بييني، مش هدفي إني حقق مصاري، بقول طالما إنه عم ياخذهن على معمل يحولوهن من البلاستيك المكسر إني معاش هيك، لافازات ورد او لاقفاص للخضرة، [it's ok] حققنا الهدف، او إنه، قلّتي زباله وشغلتي أيدي عاملة بهيدا المصنع، شغلتي هيذا الزلمة إني اشتراهن، وشغلتي إني باعن، بتصيري عم عملي حركة اقتصادية شوي، وهيك اشيا يعني. ما وصلوا لحل انا برأيي لأنه كل شي كل طرف سياسي عم يحاول يشد إنه هو انا يابا صاحب الحل، او إذا حققنا، يعني إذا مش هوّي صاحب الحل او مش صاحب الحل، الي نسبة أكثر او الك نسبة أكثر، او انا برأس هيذا المركز، ولآ انت بترأسه.

ن.ر. [01:00:58]: **مثل المعمل إني كانوا بدهن يعملوه بالكفور.**

و.ف.ا. [01:00:59]: هوّي كان موجود، ولكن اتسكّر بسبب هيذا السبب وبعده، حتّى نحنا انحرنا قدّمنا على مشروع مع الاتحاد الأوروبي، انحرنا من معدات للفرز عليه لأنه في معدات موجودة والاتحاد الأوروبي جايها وما عم تشتغل، قالولنا، بدكن تاخذو معدات وبدها تصير مثل هيدي ما عم تشتغل، يعني حطينا مصاري على الفاضي، اعملوا شي غير.

ن.ر. [01:01:24]: **ما في محاسبة؟ ما في حدا بيحاسب مثلاً؟**

و.ف.ا. [01:01:28]: ممم، بس يصير ما عشا حدا متزلم لحدا بتحاسب الناس، نحنا عنا

ن.ر. [01:01:35]: مثلاً لو اشتغل هيدا المعمل، قديه بيلافي فرص شغل للشباب؟  
و.ف.ا. [01:01:41]: أول شي ببصير في فرص شغل للناس إلي قاعدة بلا شغل. تاني شغلة بخفلك ضغط زبالة بطريفة مش طبيعية. تاني شغلة إنتي عم تعمل لبلدك لا تعمل، يعني إنه، لا، هني ببفوتوا بالزواريب الضيقة والمصالح الضيقة، المهم مصالحن الضيقة تتحقق والمصلحة العامة آخر هم من همومهن.

ن.ر. [01:02:03]: من فترة قليلة قال عم يعملوا تشجير او شي هونيك؟ وحدا صور كوارث.  
و.ف.ا. [01:02:10]: تسي تسي تسي كوارث، كوارث كوارث حتى حتى إلي ما بدوش يصدقتي وبيقول إنه يمكن انا امرأة متحاملة عليهن للسياسيين، في يبجي يشوف، بس يشوف بيقول إنه بيصدق نظره يعني بداش هلقد. والمواضيع هني سياسية، بس الواحد، بس الناس تترك إنه انا، يعني ليكي نحنا مش نحنا عم نشغل بيئة، ونحن حوالي، هلق بقلي عم نشغل حوالي 20 ست، ومن كل الأطياف السياسية، ملبكين. إنه "معقول في ناس بعدها عم نشغل هيك لوجه الله، معقول مش تابعين لحداء، مين دافشن مين عم يقبضهن، مين عم--؟". آخر شي وصلنا لمرحلة، انا باجتماع من الاجتماعات بالجمعيات والأندية بقلب البلدية لأنه كمان كانت المساندة اسم الله عظيمة من البلدية، قلتهن، بابا الزبالة لمكومة بكفرمان بيتنشغها ابن الحزب وابن الحركة وابن الشيوخيين وابن اليساري وابن المستقل، وإلي ما خصوص بشي. كلنا كلنا متضررين منها، انا إذا بشوف ضراب الطبل جايي يخأصني من مشكلة موجودة عندي، ضراب الطبل مثل ما بيقولوا، بيقولوا يلا تعا خلصني. انا عم بطرح عليكن حل كإنسانة موجودة بكفرمان، منه عمل سياسي، ونحن صبايا عم نشغل بالبيئة، وانتو شافين إنه نحنا من كل التكتلات السياسية، يعني نحنا من كل الاطياف. وعم نقلكن عمل بيئي، خلونا نتخلص من المشكلة، كل واحد منكن بيقول لمين تابعين وخافين مننا، لا معنا بارودة عم نقوص، ولا إلي عم نعمله لا بيخالف الدين، ولا بيخالف الاخلاق، ولا بيخالف العقل والمنطق. عم نعمل شي صح، وكلكن لازم تشهدوا إنه صح، قالوا "إيه 100% إنه عم تشتغلوا شي صح"، قائله شو العائق ما تمدوا ايديكن، إذا ايد وحدة عندها مشكل كبير، ما بتقدر تحله لحالها. بس إذا نحنا تكاتفنا 100 ايد ع هالمشكل منحل. هاي أزمنا، إذا نحنا مدينا كلنا ايد؟ مين ح يطلعه إنه هوي حل المشكل؟ انت، إيه لا بدناش نحل. فالشخصنة بالمواضيع بتروح هيك، إنه طالما إلي بدو، اخر شي في حدا حيسنقيد، لا لا ليش بديش ساعده، انت مش عم تساعده الو، نحنا عم نحل مشكلة عامة، ما لا بس هني ما عم يشوفوا هيك، والموضوع هني مواضيع محض سياسية.

ن.ر. [01:04:59]: لاقتي معارضة يعني؟

و.ف.ا. [01:05:00]: طبعاً.

ن.ر. [01:05:01]: جربوا يوقفون مثلاً؟

و.ف.ا. [01:05:02]: محاربة كثير، يعني إذا عملوا لقاء، ما، ما وقفنش على اللقاءات، يعني إنه "شو بهن هول، شو عم يعملوا، شو خوت؟ شو هالمشروع إلي فاتوا فيه"، هيدي اقل كلمات انقالت علينا. "اسا يومين تلاتة وبيزهوا، هولي إلي داعمين بعد شوي ببطلوا"، يعني عملوا دعايات وعملوا فبركات وعملوا، هلق نحنا صرنا سننين وهاي التالفة، محتارين، يا عمي هودي كيف ماشيين بعدن؟ هني عم يستشكلوا أمر إنه، معقول والله عنجد هول الجماعة عندن قناعة؟!

ن.ر. [01:05:47]: ما لمسوا الفرق؟

و.ف.ا. [01:05:48]: مبلأ، مبلأ، فيكي تقولي، بعد سنة ونص من الشغل واغلب العالم معارضة، رجعت ازمة الزبالة مرة ثانية. وكانت بالصيف على الطرقات، دعوا لمظاهرات، لشي ضد البلدية، وشي ضد، بدهن يولعوا دواليب. نحنا عنا نشاط كل يوم والثاني منزل عمرکز الفرز، شو منجمع بسياراتنا، من اصحابنا من رفقاتنا مطيشرين، نروح نجمع كل شي فرز ونحطه بهيدا المركز ونفرشه على الطاومات، نحط البلاستيك القاسي لحال، والبلاستيك الطري لحال والتنك لحال، هيك لأنه هيك بينباعوا. نشغل ساعتين او تلاتة عمل تطوعي، كنا حوالي عشرين ست نتناوب إلي تحضر وإلي ما تحضر، وإلي، نحل محل بعضنا، هني عم يتظاهروا قدامنا ونحن، "شو بدكنش تيجوا معنا؟"، قلنهن لا إنتو بدكن تيجوا معنا، نحنا ملاقيين الحل انتو ما لقيتوا الحل، شوفو شو بدكن تعملوا". صاروا يتحدثوا، قلنله، قالوا، بعنوا وراي قلنله "انا بطلب مساعدتكن بس بدكن تلتزموا، نحنا لاقينا الحل. الحل هو إلي نحنا عم نعملوا، بدكن يلا، منشغل كل الضيقة". قالوا إيه، عملت رجعت اجتماع البلدية، وجمعيات وأندية وكله، وصار في متطوعين سجلت اسماءها، نزل منهن 5%. بس عملنا جولات بقلب كفرمان كلها، طبعوا بروشورات [brochures]، طبعوا ستيكرزات [stickers]، وصاروا يوزعوا كياس، تبنت البلدية مشروعنا. صار العدد بدل ما يكون بال 500-600 بيت صرنا بال 2000 بيت، ضرب الرقم خلال خلال شهرين، ما نلحق قعدات ولقاءات، وهيدا عملي هيك، وهيدا عملي هيك، وبروشورات وتوزيع واشيا كثير. واجانا دعم وزعنا براميل على 500 بيت او 600 بيت إلي نحنا كنا بلشنا فرز من الاساس الأساس. كمان توزيع البراميل عمل ردة فعل بالضيقة، صارت إلي مش متشجعة تنتشج، صاروا "بي ما اجوا صوبنا، ليش ما جيتوا صوبنا؟"، يدقولنا، كانوا بالقبل، إنه في ناس مثلاً أول ما بلشنا عنجد، دقي على الباب، يطلعوا من الناضور، إذا إنتي، ما يفتحوا الباب. انت منك عم تطلبي منهن، إنتي رايحة تميلهن شي توعوي وخلص. ما يفتحوا الباب، بعدين، "ألو! إله ما عم تجوا تعوا لعنا، نحنا راح نعملكن قعدة قعدة مع جيراننا، نحنا 20 وحدة ناظرينكن تعوا!". صاروا يتسابقوا مين بدوا، صرنا نحس بوقت إنه لما الشغلة بتنتج بيكتروا الناس إلي بدهن يوقفوا بالصورة وبيقولوا إنه نحنا عملنا. قولي نحنا هدفنا يطلع المشروع، صرنا، يشتغلوا توعية. طبعاً البلدية وعدت



إنه بدها تجيب مثلاً مكبس وتك تلك، كنا نحننا عم نشغل مع جمعية اجنبية تعطينا، تفرکش المشروع على اخر لحظة، لا عرفنا سياسة لا عرفنا، راحوا المعدات منّا. قالت البلدية خلص ما نحننا نحننا منجيب. صرلنا أكثر من سنة، نحننا ناظرين البلدية لتجيب، وصار الناس إلي كانت عم تفرز، اغلبها إنه مش عم يججوا الفرز، او عم يججوا تبع البلدية العادي ياخذهن، فيلا ما افرز، خلص، في بعض الناس إذا بدك بطلت. يعني صار في مد وجزر فيها.

ن.ر. [01:09:42]: شو هبي المشاكل إنتي كحدا كامرأة أسست جمعية، وجمعية بيئية بشكل خاص، يعني شو بتحسي؟  
و.ف.ا. [01:09:50]: أول شغلة بمجرد ما انك تكوني ستّ وعملتي جمعية و هيك، الناس هيك إنه شي جديد إذا بدك.

ن.ر. [01:10:02]: بتأخذ على محل الجد؟

[01:02:04]- و.ف.ا.: ليكي بالفترة الأولى، لأ، ما تمت اتخاذها. بس بعدين في ناس وقفت وأنتت وقدرت، ويعني مثلاً، حتّى مثلاً شي من الناحية الاعلامية او من الناحية مثلاً

[01:10:19]- ن.ر.: أخذتوا علم وخبر ما هيك؟

و.ف.ا. [01:10:21]: إيه اخدنا علم وخبر، وحتّى في ناس صاروا يعني يعتبرونا من الناس الأساسيين الحضور كجمعية ممثلة بكفرمان والها مكانتها ويستشيروا برأينا، او مثلاً منتمنى نعمل نحننا وايكن مشروع، او مثلاً، او اليوم داعيينك بدنا نكرمكن

ن.ر. [01:10:43]: صرتوا تشبكوا مع جمعيات تانية يعني.

و.ف.ا. [01:10:44]: إيه صرنا نعمل عمليات تشبيك، ونعمل عملنا أكثر من لقاءات وندوات عامة، نشرح عن هيدي الاهداف، نجيب دكاترة او اختصاصيين بهيدا المجال، ونوعي. إيه عملنا شي 4-5 حلقات مع أكثر من جمعية، يعني عمليات مثل ما عم تفضلتي. فنسّقنا، أكثر شي، عم فلك بعد كان مرق شي سنة ونص كانت الناس عم تتطّلع فينا بس، نحننا شو عم نشغل، وتراقب، ومش قبلانة كثير، وبعدين انخرطت بالمواضيع. في ناس هلّق من اسبوعين لورا، رحنا على السوبرماركات وزعنا كياس قماش على كل الناس إلي بتقوت على السوبرماركت ببلاش. صرنا يعني نعيّلها غراضها بكيس القماش، ونقلها منتمنى عليكي إنه بكرأ بس بدك تيجي، تحطّيه بسيارتك وبس تيجي ترجعي تتسوقي فيه مرة تانية ومرة تالثة لأنه بدنا نخفف كياس نيلون، كياس بلاستيك، كمان هيدي الفكرة. صرنا عم نلمس إنه في بعض الاشخاص حتّى لو رقم بسيط، إيه تأثرت وصارت تاخذ كياسها وتشتغل هيك. لحتّى نكمل، بمعنى كإنه لمسنا الوعي عندهن، إنه إلي نحننا عم نحاول نزرعه.

ن.ر. [01:12:07]: المعرض بتعملوه كل سنة؟

و.ف.ا. [01:12:09]: إيه، عم نعمل المعرض كل سنة

ن.ر. [01:12:12]: شو بتعملوا بعض أنشطة؟

و.ف.ا. [01:12:15]: عملنا مرتين حواجز محبة، واحد على عيد الام، وزعنا فيه ورود نحننا زرعناها، صرنا نجيب علب البلاستيك تعول الحليب او تعول اللبنة او تعول البيبيسي، نقصن، نحط فيه تراب، نزرعه ونبلّش نزرع من أول نص شباط، ونجهزهن، وبعدين نلفهن بجنيص، او بشي مرتّب، ونوقف نوزع على عيد الام. وردات طبيعية نحننا عاملينها، وبعدين بتكبر عندهن وبينبسطوا فيها وهيك. أول شغلة، إنه يشوفوا من علبة البلاستيك رجعنا استخدمناها مرة تانية، تاني شغلة، إنه عم نحاول إنه نقدر الست إلي هي عم تحاول كمان تساندنا بمشروعنا، او فكرتنا. عملنا مرتين حملات توعية ب على عيد مولد النبي، وزعنا كياس قماش صغيرة للسيارات ونقلهن إنه النظافة من الايمان، ويعني حتّى كياس القماش مكتوب عليه كلمة النظافة من الايمان، حطوه بسيارتك، وكب بقلبه على طول. وكل يوم بس تخلص نفضه بال [basket] إلي بالبيت. ويعني عم نحاول نحننا نزرع بذرة امل، او بذرة الوعي عند الناس إلي ممكن، ع فكرة في ناس مثلاً ممكن تقلك إنه انا ما فكرت بهيدا الموضوع من هاي الطريقة او من هاي الناحية

ن.ر. [01:13:43]: ما بتكون خاطرة على بالن الفكرة.

و.ف.ا. [01:13:44]: ما بتكون خاطرة على بالن الفكرة، وهيك.

ن.ر. [01:13:46]: بتروحوا غير مناطق؟

و.ف.ا. [01:13:48]: صراحة، هوي مشروعنا نحننا بعده ضمن كفرمان، بس دُعينا على شي 6-7 مدارس، في 3 مدارس بقلب كفرمان، وشي 4 او 5 برات كفرمان منطقة كفرجوز، او منطقة الدوير، او منطقة النبطية. رحنا عملنا داخل المدرسة، لإنه في بالبرنامج عن موضوع البيئة، عملنا مثل ندوات صغار للولاد، حضرناهن رسوم متحركة خاصة بهيدا الموضوع إنه كيف نحننا نحافظ على البيئة، او مثلاً عالريسايلك [recycle] تعول الورق، وكيف نحافظ على الشجر، وتفاصيل. ينبسطوا فيها خاصة إنه موضوع ضمن الكتب تعيلن، ويعملوا عليه تطبيق [pratique]، وبعدين ناخذلهم الكياس ونقلهم حطوا البلاستيك لحال، مثلاً، أكثر شي كلهن بيستعملوا قناني الماي، نجمّع الاغطية. رحنا تبرعنا فيهن لأحد لأكثر من ولد عنده حاجات خاصة، يعملوه كرسي مدولب.

ن.ر. [01:14:47]: في جمعية يعني بتستقبل هول؟

و.ف.ا. [01:14:50]: إيه تعاملنا مع جمعية، إيه نحننا ليكي شو، الجمعيات ما تعملنا معن، تعاملنا مع الاهل، يعني يججوا الاهل يقولوا بدنا اغطية، نكون نحننا عم نصمّد، نصمّد اغطية القناني



ن.ر. [01:15:02]: \_\_\_\_\_ آههه في أهل يعني بيعرفوا إنه هني بدهن يجمعوا كمية.

و.ف.ا. [01:15:03]: عبر المعالج الفيزيائي، بيحي يقولن إنه هيدول الالهل، بدهن يجيبوا كرسي مدولب لابنهن، نعطيهن نحنا الاغطية إلي نحنا مجمعينهن، او بالمدرسة او بالجمعية تبيعتنا، ونزلن ينزلوهن على هاي المؤسسة، ويعطوا لكل ولد، وحتى باطار ثاني عملنا معرض مرة، جمعنا تياب. تياب. عملنا معرض فيه 3 ايام، تياب نحنا، انا مثلاً تياب بتصغر عولادي، بعدها بحالة جيدة، بتصغر علي بعدها بحالة جيدة، او على زوجي، صرنا. هلق انا كنت قبل، انا شخصيا، كنت صرلي شي 5 سنين بنزلهن على بيروت، او باخذهن على جمعية بقلب حبوش.

ن.ر. [01:15:53]: اه كنتي تعملي هيدا الشئ قبل؟

و.ف.ا. [01:15:54]: كنت اعمل انا بشكل خاص، يعني ناس اصحابنا حوالينا. في عتاً، مستشفى الفنار كان موجود هون، في الناس إلي عندهن حالة نفسية او شي، مرات يكونوا بحاجة لتياب او هيك شي، فنحننا نجمّع شو عتاً، وناخذهن على هاي المستشفى او ننزلهن على بيروت، حملة دفا، او، يعني في أكثر من مجال، كنت انا جمعهن بسيارتي الخاصة. في ناس كثير يجيبولي تياب، مثل ما هلق شفتي إلي عالبا، هلق انا مثلاً ما عرفت التياب البرا من مين، ما بعرفن، هلق بشوفن.

ن.ر. [01:16:27]: بيعرفوا انو إنتي بتهتمي بهيدا الشئ.

و.ف.ا. [01:16:29]: إيه، بفقدهن، المهم إنه يكونوا مناح، هلق اغلب الناس صارت بتجب لي بتجبلي اياهم ما فيش داعي تشبكي عليهن، يعني ما حدا بجيب لي شي مخزوق، او منتول، او منزوع او مدبوغ. لأ- بجيبولي بعضن، إلي ممكن تعطيهن لحدا ويتسفيد منهن. فالسنة الماضية، قد ما جمعت أنا، إجا لعندي كمية تياب فوق الحد، وها يعتبره انا هدر. جمعناهن، شو بدنا نعمل، شو بدنا نعمل؟ قلنا يلا، قصدنا أحد الاصحاب، فيك تعيرنا هيدا المحل، ليومين قال لخمسة ولشهر إذا بدكن، قولي في ناس

ن.ر. [01:17:09]: قديه حلو لما تلاقي هيك تعاون.

و.ف.ا. [01:17:10]: إيه إيه طبعاً، شخص ثاني، بدنا الطاولات من عندك من المطعم، على عيني. أمنا هل طاولات، حطينا هل أغراض. الناس اجت، في لبناني وفي سوريين محتاجين، اخدوا هالتياب، لبسوها انبسطوا فيها. عملناه المعرض على مدى 3 ايام، انت انبسطي إنه هودي على الاقل إنه مش راحوا على التلف وعل الكب، وهني بعدهن مناح. في ناس، حدا محتاجن، استفاد منهن. عم قلك كنت اعملها انا على شكل شخصي، بشكل ضيق، بعدين هلق عم تاخذ [تضحك]، كونا كمان اعادة تدوير التياب هو من ضمن مواضيع الريساكيل [recycle] وحتى موضوع إذا بدك القماش بالطبيعة كمان، مانو شي بيتحلل بشكل طبيعي.

ن.ر. [01:17:52]: ما بيتحلل صح؟

و.ف.ا. [01:17:53]: فنحننا منكون هيك جزء من النشاطات البيئية إلي-- وبعد في كمان مثلاً إذا بدني احكي على شكل خاص، انا من شي 6 سنين او أكثر شوي، صار عندي حدا قريب علي، عنده سرطان [cancer]، كان شعري لنص ضهري، قتلته لزوجي انا نازلة على صيدا عندي شغلة بدني اقضيها، رحت قصيت شعراتي وتبرعت فيهن، كانوا عاملين حملة بصيدا، لمرضى السرطان. جيت، تفاجئ زوجي إنه انا شعراتي قاصبتن على الاخر، قلتي "شو عاملي؟" [تخفص صوتها]. قتلته تبرعت بشعراتي، طبعاً هيك إنه [تبتسم]، قلتي "قديش حسيت للحظة إنه انا انقهرت إنه إنتي قصيتي شعرك، على قديش ما أني هلق حاسس فخور إنه عندك هالروح الانسانية" [تضحك]. فقت طبعاً، صارت كل الناس بعدين تسألني "تشفق" ليه قاصّة شعرك؟؟؟". تبرعت فيهن، تبرعت فيهن، لأنه كان عندي حس هيدي الانسانية القريية علي، إنه عندها حالة. عندها معاناة فانا بدني كون سند لألها، و"إيه بدك تقصّي شعرك، وانا بقص شعري، وبكرا بيطول". فالحس، لما انت تقربي من الناس وبتعلمين هيدا الاحساس، هيدي المعنوية لحالها--

ن.ر. [01:19:23]: التضامن.

و.ف.ا. [01:19:24]: هيدا التضامن قديه هوّي كبير للشخص المريض قديش هو بيعطيه قوة، وقديش بيعطيه بدفع، وقديه بحسسه بأهميته بهاي الحياة، وبيصير يعطيه، هيّي بالنسبة للمناعة وما المناعة. وكرت المسبحة من وقتها، صار انا ما عاش عم يطول شعري، لأنه كل فترة بس يطول برجع بقص. كمان من، صرت منزلة على مركز السرطان بصيدا، شي 4 سنط، سنط ملانة شعر، قد هيدا الكيس [bag] كله، بيقصوه، بيتصلوا فيي، نحنا قصينا شعرنا وين منحطه لحتى تاخذلنا اياه؟ مرقولي على محل عند زوجي، بخلولي اياهن. بجمعن بجمعن بجمعن، بس يصيروا كيس كبير، بنزلن، هيداك اليوم بس نزلت وعم اعطيهن اياهن كمان، كمشوني، أول مرة رحت عطيتن اياه بس ما عرفوني من مين وهيك، وبعدين بس نزلت ثاني مرة، قالتلي بدني اعطيك كارت [carte] شكر اقل شي، إنه انا مبسوطة إنه انتو هيك، فهلق صاروا كلن إنه بس بدكن منحكي بيحكو معي، منجمعهن، ومن جمعتين عم قلك نزلت اخر مجموعة، كمان صارت هيدي جزء من الأشياء إلي--

ن.ر. [01:20:43]: بتعملها.

و.ف.ا. [01:20:44]: منعلمها [تضحك] إلي هيّي.

ن.ر. [01:20:46]: إنه الخير بيجر بعضه.

و.ف.ا. [01:20:49]: إلي إطارها انساني صح، والخير بجر بعضه، صح.

ن.ر. [01:20:52]: بدي اسالك كيف بتحموا الهدف تعلقن وإلي هو هدف بيئي، وحماية البيئة، من التسييس، او إنه يصير برنامج للدعاية، واخذ الصور مثل كثير جمعيات عم تصير؟

و.ف.ا. [01:21:03]: إيه هلق انا بخاف على هيدا وهيدي نقطة بدها كثير اندفاع وبدها كثير عطاء وبدها من وقتك، يعني، فوق الحد، يعني أنا قدرت خوفي على هاي الشغلة، بهاي الفترة عندي كان ظروف، مرقت عندي حالة سخونة لامي، مرقت صعبة كثير، وقعدت بالمستشفى وراها زوجي سخن كمان ضل وقت كبير بالمستشفى، وهلق رجعت حماتي، ورا بعضن يعني. من راس السنة لهلق ما ارتحت، فحسيت بخوف إنه انا ما اقدر كون عم بقدر صوب الافكار، او صوب الخطى او ثبتها. بس قولتي دايمًا يعني مثل انا مثلاً بقول إيد وحدة ما بتزقف، والإكيب [equipe] الموجود عم نشغل على هيك، إذا وحدة مننا شافت نقص بمكان معين، بتساند، وبتحط ايدها. طبعًا كلنا هلق بهالوضع بتحسي إنه عم نعيش ظروف ضغط هائلة وخاصة عل الست إلي بتشتغل ولعندها اهتمامات خارج بيتها. يعني ما بين إنك تروحي تكوني ناجحة بشغلك، وتكوني ببيتك كمان مسيطرة على الامور وعم تعطي زوجك وولادك حفن. من الرعاية والاهتمام، أو لتكوني عاملة شبكة علاقات اجتماعية موجودة فيها وحاضرة، تكوني محضر خير وبث وعي. فيهدا الامر بيتطلب مجهود دويل وتريبيل [double et triple]، بتكافلك مع ناس بيشبهوكي مثل هيك بخليكي تراتحي، وبخليكي قولتي إنه لا بد إنه هيدا الهدف إلي احنا حطيناه وعم نشغل على اساسه نصلنا محافظين عليه، وإذا واحد مال الثاني بأول يشد ويصوب، هلق عم نحاول قدر استطاعتنا، ومش، دايمًا يعني الواحد بيقول إنه ما في يضل، مش شي كامشيتيه بايدك وتقولتي هياتي كامشيتو بايدك وأكيد حققوا. الطموح والأهداف إلي قدامك بتعمليلها خطة وبتحاولي تشتغلي عليها، وبتحاولي قد ما فيكي تقبلي من الاخطاء وتستفيدي من التجارب إلي قبل. بناء عليه بيقول الواحد حبيدل مجهود، حيثعاون قد ما فيه لحتي يوصل للي هو ي حطه، أو عم يشتغل عليه. طبعًا تجارب الناس لحوالك بتخليكي تفكري، انتبهوا ليكي بعد فترة وصلنا لهون، يعني لازم إنت تعملي شي عم تتخطي هاي الفترة وتقطعها.

ن.ر. [01:23:46]: تطوري الفكرة.

و.ف.ا. [01:23:47]: تطوري فكرتك او تشتغلي عليها، وانا مثلاً بقول إنه \_\_\_\_\_

ن.ر. [01:23:50]: كيف اخترته اسم الجمعية؟

و.ف.ا. [01:23:53]: إيه خلال، هول السنين، مثلاً في فرق بين إنك إنتي بلشتي بخطوة إنه نحنا نقوم بالفرز من المصدر، كان اسمنا سوا منفرز، بعدين قلتن إنه الخطه، كلمة سوا منفرز هي حملة من الحملات التي سنقوم بها. نحنا علينا نوعي بأطر كثير كبيرة، وتشعبت القصة، ما بين مثل ما هلق تحدثنا، إنه معاش مسألة انك عم تفرزي بس، صرتي عم تعملي اشغال، معاش عم تفرزي بس، صرتي عم توزعي ثياب على ناس محتاجة، الناس الموجودة عم تستفيد من اعادة الريبايكل [recycle]، معاش بس عم تعملي هوي الشغلين، صرتي عم تعملي حملات توعية على إنه نحنا في اشيا كماليات منقدر نستغني عنها، او هيدي الاشيا، لعم تسبيلنا امراض مثل كياس النيلون او البلاستيكيات نحاول نخفف منها قدر الامكان، او نستخدم بديل عنها بيئي، او صديق للبيئة. فيعني بتجي بتصيري تفكري بهيدي الأطر، ووحدة منن مثلاً كمان كنا عم نشغل مثلاً وحدة من الامور على مسألة الانارة على الطاقة الشمسية، وحدة من المشاريع جربنا نخطلها ونحطلها هيك. وطبعًا ناطرة جهة داعمة، لأنه كله بالنهاية، كله كله بالنهاية بدك لتسيريه بدك حدا يدعمك، او يكون في سيولة بايدك. نحنا بكثير كبير وقت، نحنا عم ندعم حالنا بحالنا، وبجزء من الوقت في جمعيات اجنبية ناشطة موجودة عم تدعم بأطر، أو بعم نطلب منها عينات، يعني مصاري ما اخدنا بايدنا أو مش هددنا ناخذ مصاري، بس عينات بالاشيا إلي نحنا حيجينا إلي هبي بتنشط المشروع، او بتتججه او بتدفشه لقدام، مثل تغطية حملات التوعية، طباعة وراق بروشوريات، شغلات من هالشكل. صناعة الكياس إلي نحنا ووزعناها عملناها، هول لهم تكلفة عالية. فأوكي انت بدك تندعمني بمشروع او كي، جب لي هول وانا بتشتغل فيهن، أول شغلة بتكوني بعدتي عنك صيت، مش صيت هوي، بتكوني بعدتي عنك، عارفة إنه انت صوتي افكارك، وانت ما هدك انك تجيبي مصاري وتحطيهن بجيبك او بصندوق الجمعية، انت هدك تعملي توعية، توعية بتكون بهدول البروشورات أو بهدولي الكياس او بهدولي البراميل، او بتدفعوا للدكتور إلي عم يعملنا ندوة بيعمل محاضرة عامة وعنده معلومات ونحن منقدر نستفيد منه، وهو بكون اشتغل ونحن منكون وعينا. يعني هي امور تابعة لبعضها، هيك الامور عم \_\_\_\_\_

ن.ر. [01:26:42]: سوا منفرز هي جزء من الحملات الأساسية؟

و.ف.ا. [01:26:44]: هيتي، هيتي حملة وحدة لجمعية اسمها Terre-net الأرض الصافية، Terre-net بالفرنسي، يعني اخدنا وفتشنا كثير، وكنا عم نحاول ناخذ اسم حتى عربي إذا بدك، بس عكتر الجمعيات الموجودة وإلي عم تشتغل وهيك. اخر شي قلنا حطو اسم مركب فرنسي عربي او انكلش [English] او شي، يعني دغري ممكن و Terre-net كانت نصيحة احد الاشخاص، ورحنا قدمنا على وزارة البيئة. وكنا طارحين أكثر من اسم، وحدة منن هول، وإجت الموافقة على Terre-net ومشي الحال.

ن.ر. [01:27:36]: كيف بتنسقي بين حياتك العملية كمعلمة وزوجة والاجتماعية؟

و.ف.ا. [01:27:40]: اه طبعًا ليكي كل شي بدك كل شي بتربحيه بتخسري قبالة شي، او كل شي بدك تحطي بدك تربحي عم تخطي لتربحيه بدك تخسري قبالة أكيد، في عندك وقت بدك تكوني فيه مزروكة بالتحضيرات، باشيا معينة. وهيدا الشئ

يعتمد على الناس الموجودة حواليك بيتك يعني كزوج او ولاد او إم وإخوات، أو حماتي وبنات عمّي. فالحمد لله إنه أنا عابشة بهاي البيئة إلي هبي تعتبر بالنسبة إلي بيئتي حاضنتي بقوة، بفخر أنا إني انتسبلهن، إن كان عيلتي الصغيرة، او العيلتين الأكبر. ما بفتوا ولا فرصة والا إنه بيكونوا داعمين. وهيدا بهون عليك، بتكوني عم تركضي عم تركضي، مزروكة بهالوقت، إنه شو بدك نحنا منساعدك. حتىّ مثلاً إنه شفتي بالعمل التطوعي إليّ كنا نعمله كانوا ينزلوا اشتغلوا معي بالعمل التطوعي، من هاي النقطة بتحسي إنه ما بيكونوا متطلبين، او ما بيوقفوا لك نقار نقير على تفصيل صغير، ويخلوكي انك إنتي ترجعي. او مثلاً، إذا مثلاً يعني بيكون، مثلاً زوجي هو احد الاشخاص لمساند إليّ، بخليه يساعدي بإلقاء الضوء على ليكي هاي كيف، وهاي كيف، بساندي بأفكار معينة هولي بخلوكي إنك تنطقي مش تكوني-----

ن.ر. [01:29:23]: محصورة.

و.ف.ا. [01:29:24]: إيه، لأنه شفتي إذا كان عندك حدا بالبيت كل شغلة بتعملها عم بناقرك، أو مش عاجبتة، ما بتطولي وبتضلك مكفية، لأنه اخر شي، بتقولي إنه أو حياتي البيئية، او عيلتي. او بتصيري بتفكري شو بدك عملي، على هيك.

ن.ر. [01:29:47]: إنتي عندك ولدين ما هيك؟

و.ف.ا. [01:29:48]: عندي صبي وبنيت، بنتي الكبيرة عملت مهندسة معمارية، هلق بتقدم final تاغيلها، وابني عم يعمل استاذ رياضة عم يعمل رياضة [sport].

ن.ر. [01:30:03]: ما شاء الله. كيف بتتهمي بنفسك، مثلاً إذا بدنا نتخيل يوم، انتي كيف بتبليشي فيه، كيف بتتهمي بحالك؟

و.ف.ا. [01:30:12]: ممم يعني مثلاً اليوم اهتميت كثير بحالي [تضحك]، يعني مثلاً قمت كونه اليوم عطلة، بس إنه حماتي طالعة من المستشفى، قمت شوي بكير، بين إنه عملي، يعني تنظيفك شو اسمه، دوش، وترتيب شعري، وحطيت مثلاً لون للأظافر [eclador] [تضحك] وحطيت شوي [غير واضح]، وقمت رحت على-- انا عندي وضع صحي ما بقدر صوم، عملت كباية النسكافيه [Nescafe]، وبعتر إنه هول اخدت ساعة أنا، عندي حالة ريلاكس [relax]، ما عنديش-- مش مضغوطة بشغلتي. طليت على حماتي، وطلبت شوي على ماما، وبلشت مرحلة الاكل، وهيك. يعني كان نهاري، مع إنه-- مثل ما بيقولوا فاضي مشغول----

ن.ر. [01:31:07]: عندك مساعدة بالبيت، بتخفف عنك شوي؟

و.ف.ا. [01:31:11]: إيه مش من الأول، يعني انا صرلها هاي البنيت عنا شي 3 سنين او 4 سنين من لَمّا-- هلق نحنا بيتنا هاي اسم الله صغير، صغير كبير مثل ما بقولوا، وولدين، والجيل الي قبل ما كانت مثل هلق، انا ولادي مش من الولاد إلي بيتركوا فوضى وراهن. كانوا بيساعدوا. وانا صار عندي اشكالية بمفاصلي بوقت بكير يعني كانوا ولادي صغار، فكانوا يشوفوني انه أنا إذا بدّي إمشي ما أقدر إمشي، مرقت فترة صعبة عليّ. كان عندي حالة ضرر بكل مفاصلي، فالولد بس يشوف الام مريضة وما بتقدر تقضي كل الأشيا تعلمها، فبحاول هوي يصير يتعود على عادات، يعني يطوي تيابه، يعمل اكلاته، يجلي صحنه، يهيز ترويقته، هيدي من الأشيا بس يتعود عليها الولد، ببصير هوي كمان مش متطلب، وبيصير يعمل حسابات للنظافة وللترتيب ولهيك، وهو بيخففوا

ن.ر. [01:32:19]: أكيد التربية كمان بتعمل دور.

و.ف.ا. [01:32:20]: هول كلن بخففوا ضغط على ست البيت، أو على، إنه وبتصيري إنتي تحسي امورك منظمة، بعدن لحديت هلق، إذا قعدوا بدهن ياكلوا بس يخلصوا ببشيلوا صحونهن معن، طاولتهن مطرح ما هتي قاعدين لازم تكون نظيفة. مثل ما عم تتفضلي، إنه هتي شوي تربية، وشوي عادات وشوي يعني كله مع بعضه، ببصير يرگب شخصيته للولد وهودي بساعده إنه تكوني مرتاحة، مش إنه عندك عيلة، مطلوب منك من الكبيرة للصغيرة، من حطة الصحن لاكبر شغلة، لا، بالعكس أحياناً انا بقلن، انا مضغوطة مش رح اقدر اطبع مسابقتي. إيه ماما، نحنا منطبعك اياها، يعني بيكونوا سند إلي. فأحياناً هيدي الشغلات بتحسسك بالراحة، انا مضغوطة مش قادرة كنت طبق الاكلات، زوجي بقلي خالص انا بقلل الرز وباخذ لماما تطبلي اليخنة

ن.ر. [01:33:21]: في تعاون بينك وبين زوجك.

و.ف.ا. [01:33:23]: إيه هول الأشيا مع إنهن بسبطين بس هتي مساندة من حيث لا تدري، إنه انت بتصيري على الاقل مش عم تقوصي إنه إنتي مش ملحة على كل الأشيا إلي بدك تعملها.

ن.ر. [01:33:34]: مش عم تنقي ودراما وهول.

و.ف.ا. [01:33:35]: صح، بتريحك. إيه إذا بدّي احكي نهائياً، او هيك كخلاصة، إنه انا محظوظة يكون عندي هيك عيلة، وبتمنى كل واحد يكون بلاقي الدعم إلي انا بلاقيه، الحظ مش بالضرورة إنه الواحد يكون عنده كميات هائلة من الاموال او من السيارات واو من الأشيا، بالناس المحبة إلي حواليه، او على الأقل يكون هوي، يعمل هوي هاي الشبكة من الناس الحلوة حواليها، هوي يزرع بزره المحبة، إلي يزرع شي حلو، ما بلاقي إلا شي حلو. فبرأيي أنا إنه مثل ما بترزع بتلاقي، لازم الواحد يشتغل على هاي الافكار.

ن.ر. [01:34:28]: عندك اهتمامات بالادب والقراءات وهول قصص؟

و.ف.ا. [01:34:31]: دايمًا عندي، [تضحك] دايمًا عندي بخصص من الوقت إنه انا لازم اقرأ، يعني دايمًا في 3-4 كتب جداد، بخلص واحد وببليش بواحد، يعني حتى مثلاً، في وقت مثلاً من الاوقات إنه، دايمًا، ليكي إلي بينظم وقته، تنظيم الوقت كثير بيعطيك وقت إنه إنتي عندك وقت لحالك او عندك وقت عملي هي الشغلة، دايمًا يكون عندي وقت فراغ مرات بروح بقعد عند زوجي، عنده محمصه، حتى ما يسهر هوي لحاله اسهر أني لحالي بالبيت، وخاصةً ولادي جامعة ببيروت. فباخذ كتابي، وخاصةً بالصيف مافيش تحضيرات، بالشتا أوكيه بتحضرني بتمرقي مسابقات بتعملي شي وفي فترات ما فيهاش شي مسابقات، إيه باخذ كتاب بقعد بطالع بقرأ انا وقاعدة عنده، إجا ناس بيقد هو واصحابه مرات، بقعد انا باخذ برايك [break] وبقعد بقرا شي. مرّات بيكون جايي عباله عصرونية يتسطح، أنا ما عندي شي بحمل كتابي وبقرا. يعني بنسّق إيه. وبحس إنه كل كتاب بتقرئيه بيعطيك غداء، قد ثروة يعني.

ن.ر. [01:35:52]: مضبوط. هول كل اسنلتني كانوا.

و.ف.ا. [01:35:55]: إيه وهاي اجوبتي [تضحك].

ن.ر. [01:35:58]: عندك شي بعد تضيفيه؟ بتعرفي في كثير ناس بحبه يفرزوا مثلاً، بس ما بيعرفوا شو بدّن يعملوا، وين بدهن يحطوا.

و.ف.ا. [01:36:08]: إيه في كثير ناس مثلاً بتتصل فيّي---

ن.ر. [01:36:12]: من غير مناطق؟

و.ف.ا. [01:36:14]: إيه وفي ناس فعلاً بتحبب الفرز من كفر تبنيت من يُحمر ببيجوا بالأسماء بعطيك اياهن وبيعطيك ارقام تلفوناتن، بيجيبوا الاغراض تعيلن لإنه هنّي مقتنعين إنه هنّي، الواحد بيفرق. ليكي مثلاً انا من العادات اليومية إلي تعودتها، باخذ معي، هلق شفتيني حاملي تيروير [Tupperware]، انا بس بدي روح على سوبرماركت بكون عارفة رايحة شو بدي.

ن.ر. [01:36:42]: آه هيدي التبروير، إنتي كنتي رايحة تشتري أغراض؟

و.ف.ا. [01:36:44]: اشتريت لحمه.

ن.ر. [01:36:45]: حلو.

و.ف.ا. [01:36:46]: برحش بشتري ولا شي، الا إنه انا ماخدي تبروير خاصة فيه. عندي، بدي اشتري لحمه بدي اشتري جبنة، بدي اشتري، بكون انا حاطة عالورقة شو هنّي مشترياتي. باخذ التبروير على قد ال، بوصل على السوبرماركت، بليز [please]، بهي جبنة بهي لبنة بهي، بحطن. لحمتي كل شي وبحطن. معي كياس قماش، بحط بالكياس القماش وبجيب اغراضي، بوصل انا على البيت خلال دقيقتين. بحط التبرويرات كلن بالبراد، انضب كل اغراضي، خففت الزبالة إلي انا اصلاً بشترها وبكها، وبشترها وبكها إن كان العلب إلي هنّي عم نحكي عنهن الألبان وهولي وكان مجموعة الاكياس ووفرت وقت، وحطيتن بمجهود بسيط توضعوا وصاروا بالبراد، هي وحدة من العادات إلي انا تعودتها، بعملها وبنسبها فيها. وهلق كل المطارح إلي انا بروح بشتري منها بيعرفوا إنه ما بيعطوني كيس، وبيعرفوا إنه وين علبتك او وين التبروير تبعك، او مثلاً حتى لو إنه اضطريت دقلهم على التلفون بليز بدي كذا كذا، اوك راح جهزلك اياهن لكنتي جيتي يعني؟ ولا بحطلك؟، لا انا جايي وجايي علبتي معي، حتى بيسألني عالنفون، منجبلك، يعني منحطن بكيس، أو؟ لا، أنا جايي علبتي معي، أو بيعتلن حدا مع العلبه.

ن.ر. [01:38:12]: بيتعودوا عالفكرة.

و.ف.ا. [01:38:14]: بيتعودوا. حتى مثلاً مرات بكون رايحة اشتري شي أكل خالص، وهيدي طبقتها مرتين تلاته، وحتى يعني صاحب المحل نزلها على الفايبيوك إنه انا [تضحك] اخدت علبتين قزاز كاستين قزاز وإلهن اغطية وصحن كبير، قلت له حطلي فيه الشاورما وحطلي الكيبس والتوم وهولي. قلّي "فيني صورهن؟". قلنله إيه فيك تصورن [تبتسم] بس انت هلق بدك تجيب على حالك، إنه كل الناس بتصير ثقلك منشترني من عندك بتعطينا اياهن بقزاز [تضحك]، قلّي "لا عجبتني الفكرة!". فعلاً، نزلها على الفيسبوك، إنه، بيقولوا أنا بحب اهتم بحالي، أنا بعنبر إنه إذا باكل بالقزاز أو بجيب اغراضي بهي الطريقة، انا عم غنّج حالي، وعم اهتم بصحتي بأقصى الحدود. وهيدي القناعة الموجودة، في ناس بنقلّي، الصبح "بتروحي حاملة كباية النسكافيه القزاز عالمدرسة؟"، بقلهن، إيه، انا إذا ما بدي اشرب كبايتي بالقزاز واستمتع فيها، إنه أنا عم بركض وعم اتعب وعم طاحش وعم ضحّي بكل هاي، اخر شي مسترخصة بحالي كباية، انا لازم اشتري كباية كريستال واشرب بالكريستال. غنجوا حالكن [تضحك]. وأنا هاي-- وهلق 3/4 زميلاتي بالمدرسة كانوا يشربوا كله بكرتون، جيبوا ماغ، اشتري ماغ [mug]، بجبلكن أنا، بشتري أنا، مثلاً انا ماخدي أكثر من ماغ. في بلا ما تجيبي الكرتون، جيبي الماغ. هيدا البني، هيدا الاحمر، هيدا الأخضر. أنا جايية من كل الأشكال وكل الألوان. بصير بشجعهن إنه غنجوا حالكن شو بدكن بهاي الأمراض.

ن.ر. [01:40:06]: كأنه الناس معاش بدهن يتبعوا بتحسي هالأيام، بدهن هيك كل شي سهل، كلنا يعني.

و.ف.ا. [01:40:10]: بس، مثل ما بيقولوا كل شي بينردّ عليك سيء بتحاولي— لازم تحاولي تبعديه عنك، يعني مثل ما واحد بيفكر بالسجارة او بالأرغيلة قديه هي سيئة تحاول يبعد عنها، انا بقول كل هول الإشي البلاستيك عم تعملي أمراض

أو عم تعملي يا اختي مش 1% بدي قول [chance] إنه أنا يصير عندي، لا مش مضطرة. ما أنا في 90%، 99% بتفوتي عبيوتها كماليات فول [full]، كماليات، كريستال، ترييات كريستال، شو ما بدك، مش مسألة إنه هني بخلاء على حالن، بالعكس، هني بيعتبروا هيه الكرتون — إنه أنا بشرب بالكرتون لأنه بديش تعب حالي، بس إنتي عم تاخدي سموم. لازم إنتي مش تتعبي حالك، إنتي لازم تغنّجي حالك، لا اشربي بالقزاز، واهتمي بحالك، هيك بتكوني عم تهتمي بحالك، يعني بتحاولي تزرعي هيك أفكار [تضحك].

ن.ر: [001:41:03] حلو

و.ف.ا: [01:41:04] مم

ن.ر: [01:41:05] يعطيك ألف عافية